

國史列傳

滿漢大臣列傳

卷五十七

馮鈐

周元禮

蘇爾相

馮鈐浙江桐鄉人父景夏官刑部侍郎鈐乾隆二年進士授主事分部十年二月補主事四月遷員外郎十月擢郎中十一月授湖廣道監察御史十二月奏除漕糧積弊得

旨允行十四年授刑科給事中十五年提督福建學政十九年擢貴州貴西道二十一年九月遷按察使二十二年十一月調安徽按察使十二月遷山東布政使二十三年三月擢湖北巡撫四月調湖南巡撫六月因廣東倉穀平糶缺額兩廣總督陳宏謀奏准撥運楚南穀石鈐議撥常平倉溢穀四十萬石運赴粵東並請速爲買補以充積貯如所議行七月以兩廣總督陳宏謀委員至衡柳湘潭等處買穀恐致民間米價昂貴奏請於長衡二府屬貯穀內照價即時撥給得旨嘉獎二十四年正月奏湖南長沙府屬之瀏陽縣向設巡檢一員駐筍梅子園地方離縣止五十里該縣北鄉永平市離縣

八十里居民稠密好勇健訟請將梅子園巡檢改移永平市更名永安市巡檢又寶慶府屬之武岡州向設州同一員並無專管政務查該州高沙市一鎮離城六十五里居民不下千戶商販絡繹雖該州蓼溪司巡檢巡查不足以資彈壓州同駐劄州城實屬閒曹若移駐高沙市一切皆歸該州同查防所有蓼溪司巡檢另行移駐查寶慶府屬邵陽縣之里田鋪離郡城七十里該地爲赴省通衢人烟輻輳五方雜處若將武岡州屬之蓼溪巡檢移駐該縣里田鋪非惟賊匪等項可以稽查抑且該州縣查勘人犯亦可防範于地方有裨益下部議行三月疏稱湖南爲產米之鄉通省常平倉共存正額溢穀積至一百四十餘萬石將來秋收穀賤本省再議採買陳陳相因而勢須撥協之隣省每當需用之時又未能即受協濟之益請于附近水次各屬常平倉穀動撥三十萬石運赴江南平糶

諭曰據馮鈐奏請於湖南各屬常平倉存貯項下動撥穀三十萬石委員運赴江南轉運平糶該省素稱產米之鄉值茲米穀充裕酌盈濟虛鄰境封疆大吏辦理正應如是現在江省米價

甚平秋成亦屬有望尙非急需接濟之時然令米穀流通俾各處倉儲充實於地方亦有裨益著傳諭尹繼善令其通籌熟計該省情形應運至何處存貯以備撥用或不需撥用三十萬之多卽留一二十萬石其餘穀石另行碾米于明歲漕船北上時搭運至京如果江南無需此項卽全數運京亦可其自湖南運至江省事宜卽著尹繼善咨商馮鈐妥協辦理旋據兩江總督尹繼善奏稱江省連年豐稔米價平減無庸平糶各屬倉糧亦于上冬採買此項米石尙非急需應遵

旨全數運京於明年江浙漕船搭運

諭曰江南旣無需用米之處所有湖南撥運穀石若必運至江省交兌存貯又於明歲漕船搭運進京殊多輾轉著傳諭馮鈐將此項穀卽於本處碾米于今年各漕船起運時隨便搭解交通倉兌收自較簡便尋因湖南額設漕船不敷搭解鈐議將湖北漕船均勻搭配裝載起運得

旨允行會值浙省歉收浙江巡撫莊有恭奏請動撥公項銀兩委員赴江廣採買米石

上以楚省有應行搭運通米十五萬石

命就近兌交浙省委員領回備用又

諭曰據馮鈐所奏湖南常平倉尙多溢穀且有節年加買穀石若於楚省附近浙省水次各屬倉穀內再行酌撥一二十萬石合之前運米石自足敷該省接濟之用而於產米本地民食市價均不相妨最爲妥協該督撫等可卽彼會商以濟公事嗣因浙省止需二十萬石旋卽照數兌交委員領運回浙四月奏湖南彬桂兩廠向計產鉛十六萬斤近年出產漸微請于例買黔省白鉛二十萬斤外增帶二十萬斤以備缺乏嗣後仍祇運常例之鉛毋庸加帶

上允之二十五年三月奏苗疆知府同知等缺向例五年俸滿題陞嗣請於五年俸滿後核其政績可觀地方安謐者保題以陞銜註冊俟再滿三年卽行升用但查苗疆人員旣寬以八年之限向例祇用附近應陞之缺恐久任賢員轉不如腹地人員升遷之速請嗣後苗疆應陞之員無論附近及應題應選請旨之缺俱准其陞下部議行二十七年十月調廣西巡撫二十

八年四月奏粵西幹盧二廠開採年久出鉛漸少請令湖南仍買黔鉛不必赴粵西購運至粵東一省需鉛無幾仍令赴買諭曰各省鼓鑄錢文並需鉛斤應用該撫雖因該省廠鉛稀少奏停湖南採買而以同一總督所轄之廣東則又仍聽購運未免意存畛域所奏殊未允協且摺內稱將楚南二十八年所需白鉛二十萬斤停其買運是湖南需鉛卽在本年此時諒已委員赴粵又豈可聽其徒手而回致誤該省鼓鑄耶着傳諭馮鈞與宏謀彼此會商通融籌辦將現在所存廠鉛酌量配給務令兩省鑄局均無貽誤至幹盧二廠現在出產無多或可于該廠之外設法相度再爲開採使鉛斤益加充裕更爲妥協尋奏稱粵西本省鉛局歲需白鉛及應備湖南廣東二省採買每省需得鉛七十萬斤方可源源接濟現在幹峒盧架二廠開採年久所出遞年減少查二十七年湖南採買粵鉛委員甫于本年正月內自粵起程運回是湖南二十八年所需鉛斤尙可無須採買至廣東所需鑄鉛若令一併停買則須委員前赴漢口採買既覺路遠費繁且爲數無多粵西尙有局鉛七十萬斤可以買

現接准湖南巡撫陳宏謀札稱湖南鑄局尚有積存白鉛一百五萬八千餘斤可供三年之用本省尚有可開之礦自此以後不須採買粵鉛二十八年買鉛之員尙未起程等語除將廣東所需鉛斤仍照原奏令其赴買並飭各廠員加意督率廠工人等盡力開採毋得透漏以冀礦沙復旺並令該府縣相度形勢於該廠之外另尋砂苗設法開採報

聞八月奏廣西潯州府屬之貴縣桂平二縣額糧撥解左江鎮標協營兵食向俱係煮熟穀米緣該二縣地氣潮濕生米貯倉一經夏月易霉蛀但穀經煮熟米必味淡力薄自不若生米之力足而味甘請將貴縣桂平自本年爲始照各屬一律改徵生米民情亦便

從之三十年三月調湖南巡撫十一月調安徽巡撫三十一年十二月奏安徽廬州府屬合肥縣爲南北通衢一切解餉解犯絡繹不絕委護員弁有顧此失彼之虞請將廬州府照磨移駐合肥縣之梁園地方其照磨事務歸府經辦理尋部議裁照磨改設巡檢一員駐劄梁園

從之三十二年十月奏常平倉穀遇有動用例應隨時買補安徽一省自乾隆二十六年後節次災賑動用及蠲免民欠口糧籽種共缺額六十餘萬石除買補外尙缺五十萬石本年穎州府屬秋收豐稔已撥司庫銀分發各州縣採買查本年安省沿江地方間有偏災未經水各屬仍屬豐收現在含山縣之運漕桐城縣之棕陽舒城縣之三河各鎮米穀聚集價值平減未便因偶有成災拘泥停買得

旨嘉獎三十四年二月

諭曰據馮鈐疏參太和縣知縣郭世誼將重價購買之妾餽送幕友史緯義而史緯義即係該管之潁州府知府史魯藩之族叔該縣巧爲逢迎該府有意徇庇業經降旨一併革職嚴審究擬並諭馮鈐據實查辦又

諭曰馮鈐題參太和縣知縣郭世誼蕩檢不職該管之潁州府知府史魯藩縱庇劣員一疏史魯藩身爲方面大員乃令族叔在所屬署中作幕是其上下通同逢迎挾制諸弊皆所不免此等惡風斷不可長嚴加懲治該撫馮鈐平日豈毫無聞見何竟

不早爲參奏直待史魯璠告病詳請解任後始以一參劾塞責外省徇弊屬員劣習每遇劣跡彰著尙欲爲之設法成全卽或知其事萬難掩覆不得已始以一掛彈章藉名整飭而其實不過隱售化大爲小化有爲無之術此等伎倆豈能施之朕前馮鈐辦理此案有意取巧故于事後糾彈藉以掩其前此袒庇之咎此而不加以嚴懲則督撫等益以瘼視察吏爲得計誰復知所警畏馮鈐著交部嚴加議處復

詔解任聽候部議旋議革職發軍台効力尋贖罪回籍三十五年八月恭遇

六旬萬壽鈐赴闕祝

嘏

特與按察使銜十一月卒

周元理浙江仁和人乾隆三年舉人授直隸蠡縣知縣十四年調清苑縣遷霸州知州以經理城工仍留清苑累遷宣化府知府旋丁母憂二十七年服闋補廣平府調天津府又調保定府三十年遷清河道三十三年遷按察使三十四年擢布政使三

十五年以捕蝗不力降三級留任三十六年二月

命同尚書裘曰修總督楊廷璋勘青縣漳州減河及河道閘座合疏言減河之設原因洩運河盛漲非同閘座啓閉兼以蓄水也今閘座皆高出河面數尺當水洩既不藉閘板之積蓄則水發亦惟賴減河之暢流宜用滾水石壩不應更立閘座其滄州之捷地閘形勢兜灣應改壩移近河旁裁曲就直以順水性至減河每年遇水後往往受淤壅塞必須測量疏濬使水得順流達海

上是之三月授山東巡撫十月奏小清河發源章邱之長白山承章邱各縣河流及各泊之水至樂安縣達尾閘之海河門入海其北建軍張壩一分北條爲支脉溝南條爲預備河乾隆五年又於預備河之南接挑福民河以分水勢其自章邱至博興又有濟山清河麻大會城猴子等泊爲納水之區本不應時有漫溢前撫臣富明安因迤東一帶入溜河尾閘二十餘里河淤水溢逐次挑濬然止治其流而未清其源以致涸出地仍被淹臣悉心籌畫惟在先將濟山清河二泊濬深開廣遇水發時有

所停蓄然後聽其入河歸注入海又下游各河各年責成各縣農隙濬淤使水患可弭報

聞是月遷直隸總督三十七年正月疏劾三座塔監督長春私設稅局鞠實論罪如律三月疏言直隸雨多河漲通京一帶衝衝疊道閱久未修日漸衝刷小溝渠多未濬上年行潦無歸塗旅多滯而溝渠淤阻漫淹民堤民埝在在衝缺田廬均受其患應照以工代賑之例覈實估修今勘天津東門外之海河疊道又宛平大興良鄉房山涿州定興安肅清苑滿城正定新樂邢臺沙河永平邯鄲磁州新城雄縣任邱獻縣景州昌平懷柔密雲等州縣疊道悉係通京並山東山西河南衝途日就低窪跨道木橋亦多坍塌又良鄉之茨尾雅河已淤官莊一帶河身幾同平地新城雄縣之盧僧河爲分減白馬溝河之盛漲新城清河民埝雄縣東南老堤並清河兩岸民埝均係迎溜要工任邱近淀民埝獻縣臧家南北兩隄逼近滹沱並有填淤衝漏應併籌核請乘汛期未至之先一律興修勒限報竣

諭曰應舉行者工歸實用可也時

命尙書裘曰修閱直隸河工旋合疏言直隸諸水千支萬派總由三汭河爲入海之道運河西岸則大清河會永定而出子牙河會三支黑龍港而出全資西岸疊道堵橋穿運而東匯入海河今東岸自南倉下改爲疊道盛漲時可徑達場河淀不專恃海河爲出口但西岸橋座向止十一昨委員估添六座臣等復估又添三座多其出口俾無壅遏則上游不致受害至格淀隄原爲隔別清渾而設今子牙渾水自莊兒頭至當城以下漸次澄清其來甚遠而出口專注大經橋實爲太逼向來於格淀堤之尾閘王家河俞家河建橋座與清河通流然過水有限以一隄支拄南北子牙與清河兩相衝激落漲不能徑下徒費增修莫若自當城以下現衝段落改爲疊道水大聽其自漫水小仍于行人便利并于疊道上酌添涵洞數座不專恃王家河俞家河兩樁則行水暢順而子牙下游澄清亦斷不至清河受淤詔如所請五月雄縣民劉盡忠控知縣胡錫瑛盜賣倉穀命裘曰修借戶部侍郎英廉往訊得實定罪

諭曰直隸散賑前據周元理奏稱核所屬俱實力辦理民治實

惠今雄縣之案地方官之辦理已可概見所稱賑務妥實者安
在著嚴加議處部議革任得
旨從寬留任三十八年二月

上巡幸天津

賜詩曰三輔羣瞻首善風文濡武詰寄攸同河工綦重永期宴
民氣稍蘇慢詡豐昔以旬宣職克盡今惟節鉞任逾崇佐人人
佐道斯異挈要無過虛與公四月加太子少保六月

上詢金門閘宣洩情形疏言金門閘舊有攔水單壩春間蒙
親臨指示加長使有回溜過壩並令求賢北邨兩灰壩並照金
門閘添築攔水一道以緩水勢卽恪遵妥辦現在隄固溜緩並
於河流去路一體濬治務使積淤盡刷水道暢利令永定道滿
保核定章程遵守得

旨嘉獎十二月偕侍郎兼管府尹蔣賜棨同勘八旗在官荒地
奏稱從前拋荒地畝多由水衝沙壓及鹽鹺石子施工較難收
利亦薄漸成廢棄臣等屢畝察驗內有附近熟地之處儘可墾
種及沙鹺僅蓋浮面稍去卽有土可藝其時卽有原業佃戶在

旁面加曉諭此地墾成不但可收租息並免滋生蝗孽大於農田有益況八年後起租實多利便伊等亦欣然認墾查八旗原報荒地一百餘頃今勘得可墾地五十二頃零在官原報荒地一千三百餘頃勘得可墾地四百十七頃零臣等酌議俟承墾四五年令州縣勘明如果成熟酌定租數報司存案俟八年期滿覆勘無異照租額徵收查墾熟在官地畝例禁典賣該佃自應永遠墾種至八旗荒地除有業主外照例入官徵收又沮洳庫下之區分別開溝洩水因勢利導其難資宣洩者無庸開溝以節民力下部議行四十年元理年七十奉

命入都

御賜甸封綏壽額並

命紫禁城騎馬四十一年二月

上巡幸山東過天津

賜詩曰微職洊臻幕府開京畿最久更長村事無巨細無弗悉民有艱難有賴培莫詡駕輕斯異耳可知責重益憂哉道塗供帳寧須亟夏諺猶慚爲度來九月同學政羅源漢請於熱河增

建學校下部議行四十三年正月

詔改熱河爲承德府其酌改事宜令元理悉心籌畫旋請改入溝爲平泉州喀喇河屯五廳爲灤平豐寧建昌赤峯朝陽五縣均隸承德設知府知州知縣及酌增教職佐雜俱下部議行五月奏熱河人烟輻輳附近山岡多產煤處今潘家口汛土窰子山場現已試探煤旺窰成應請開採

詔允之十二月以歲暮錢價昂增請酌撥局錢發換以平市價上是之四十四年正月疏言宣化府城外西北臨柳川河爲常峪青邊口外諸山水匯歸之所每遇汛漲直逼城根向有護城隄年久衝塌臣前年閱兵親加勘驗請改建石塘並築石坦坡以期鞏固報

聞先是井陘知縣周尙親短價派買倉穀復因修橋廟科派民錢三月劣生梁進文集衆毆役縣民李馥等爲之斂錢上控元理請懲刁風分別定擬未將派累之知縣劾奏

上以元理袒護劣員解總督任
命尙書福隆安往鞫之元理具服

諭曰據福隆安查訊井陘縣民聚衆抗官知縣周尙親科派屬實周元理袒護本應革職發往軍臺姑念其年老著革職仍加恩賞給三品銜在正定隆興寺管理廟工効力贖罪十二月授都察院左副都御史暫署直隸總督四十五年四月遷兵部左侍郎九月擢工部尙書四十六年因病乞休得

旨准回籍調理加恩賞給太子少傅銜四十七年十月卒於家遺疏入

諭江蘇布政使前往致祭一壇

蘇爾相甘肅靈州人乾隆六年由貴州上江協馬兵隨征南江苗匪有功十三年拔補本營外委十八年調古州鎮外委十九年擢把總二十二年陞荔波營千總二十六年赴部引

見得

旨以守備補用三十二年隨大將軍公明瑞征緬甸帶兵攻蠻結一路生擒緬賊四名奪獲長鎗刀弩馬匹無算遂進攻猛弄三十三年正月攻克猛弄坤曼戶董蠻化等處又轉攻南坡大山城虎市蠻獠二月追勦至天生橋猛育地方共接仗二十五

次均列爲超等功七月補貴州定廣協守備十二月隨副將軍阿桂等進兵奇木嶺三十四年六月經略大學士公傅恒等奏蘇爾相出師打仗著有勞績監造大礮頗知實心用事請授雲南奇兵營都司

上從之十月攻老官屯賊寨奮勇身先鎗傷左腿復力疾攻勦兼旬不懈屢蒙

賞賚銀兩是月緬匪懇求解圍傅恒以病奉

旨回京

命阿桂辦理撤兵事宜蘇爾相奉檄回永昌三十五年雲貴總督彰寶因緬匪久渝不至差赴老官屯投遞檄文緬目諾爾塔羈留之事

聞

諭曰彰寶等摺內所稱蘇爾相爲彼拘留自應再發檄諭嚴飭諾爾塔向其索還即可遣送信之外委鍾朝相齎去並令其面諭蘇爾相云爾身爲都司帶有兵丁同行豈無防身器械前日諾爾塔請爾進城逼爾接阿瓦來信卽當同衆兵捨死拚命殺

傷彼衆即不然亦當挺身罵賊何竟束手無策聽其拘絆十月阿桂等覆奏接到蘇爾相稟詞及諾爾塔書字

諭曰昨冬攻圍老官屯緬酋至軍營懇請解圍情願奉表納貢並送還所留內地之人我兵始行撤回乃延挨數月杳無信息因諭阿桂派人持檄往彼詰詢而所派都司蘇爾相至老官屯竟爲諾爾塔所羈蘇爾相不能申明大義罵賊捐軀甘受賊匪拘絆已屬無恥貪生罪無可逭今據阿桂等奏到蘇爾相所遞稟詞惟述賊匪向詢之語並無一言斥責並爲賊人代詢不通交易之故直是與賊詭詞進說實爲國法所不容輕恕該犯情罪如此可惡即其家屬亦當加之罪譴以昭法紀查蘇爾相籍隸甘肅著傳諭明山嚴飭所屬將伊妻子鎖拏派委委員解交刑部嚴行治罪十二月陝甘總督明山奏奉

旨拏解蘇爾相家屬當卽委員將伊父母及伊弟蘇爾忠蘇爾福押解赴省並查得伊弟曾經過繼四川譚姓業經飛咨川省拏究

諭曰蘇爾相甘爲賊匪拘留並敢詭詞進說爲國法所不容輕

恕其妻子自當加以罪譴至伊父母兄弟原可毋庸緣坐著傳諭明山將現在拏解之蘇爾相父母及伊弟蘇爾忠等並予開釋不必解京至其過繼之弟並著咨明川督毋庸辦理三十六年刑部奏據貴州巡撫宮兆麟委員將蘇爾相之妻蘇張氏及子蘇若霖女二黑三黑等拏解到部查蘇爾相奉差傳檄受賊羈絆稟詞又復悖謬實爲國法所不容其家屬應發往伊犁給披甲人爲奴今其子女均未及歲應請照辦理書敏楊重英等家屬之例將其妻蘇張氏並其子女暫行監禁俟及歲之日一併發遣得

旨允行蘇若霖等先後殞歿蘇張氏發遣歿於途三十七年彰寶奏緬匪大頭目得魯蘊差其親信緬子孟矣等到關稱得魯蘊自阿瓦差到老官屯辦送貢禮並送還內地之人請限於六月初十日親自來見現將孟矣等看守在營至期酌辦諭曰緬甸水土惡劣非人力所能施是以早經定意不欲於瘴癘之鄉復勞師旅非若兩金川以內地土司負隅逆命必應勦除者可比如果懜駁誠心悔過送還內地之人納貢求降原可

允其所請但必須將楊重英蘇爾相及有可稽考之員概行送回方成事體三十八年彰寶以譯出緬匪回信并訊取蠻轟供情具奏

諭曰緬匪狡詐百端本不足信而蘇爾相所具稟詞仍係綻拉機授意尤不足憑四十年署總督圖思德奏緬酋遣頭目秤官猛等來議入貢事

上命械送京師下獄四十一年平兩金川逆酋索諾木及黨惡頭人等俱解京正法

命刑部押緬目赴西市看視行刑且告之故秤官猛等惴慄敲棘不敢仰視因械至雲南令其歸諭緬酋俾知中國威武其年緬酋懵駭死子贅角牙襲頗知悔懼頭目得魯蘊等亦深慮獲罪終難安處且因上年商辦還人貢象之事檄諭嚴正屢次擲還稟詞益加畏懼於是誠意貢表並送還蘇爾相等及內地被留之人兼請開關通市圖思德據以入奏

上命大學士公阿桂往經理受降事宜四十二年正月

諭曰前據圖思德奏聞得魯蘊現在阿瓦料理貢物並欲將蘇

爾相多朝相接往阿瓦要同楊重英俱從天馬關送還內地並欲親自到關叩懇納貢等語已令阿桂馳驛前往雲南經理受降諸事又調李侍堯爲雲貴總督並將籌辦機宜詳諭圖思德矣計此時得魯蘊已辦貢投誠並將楊重英蘇爾相等送還內地亦未可定此等送還之人恐其心生畏懼圖思德可派委妥員伴送來京不必加以鎖押惟宜沿途留心防範勿稍疎虞四月得魯蘊將蘇爾相及其隨往弁兵送還永昌阿桂等因訊錄他犯供詞及蘇爾相被留八年屢欲引決不得情事具奏上命阿桂傳諭蘇爾相曰伊從前原係奉差前往被賊羈留本無過失且聞其屢次欲尋自盡情頗可憫到京後尙欲加恩令其不必憂懼途中並無庸鎖解卽令伴送之員同其馳驛來京七月赴部引

見奉

旨蘇爾相著發往雲南交李侍堯遇有遊擊缺出卽行補用仍賞假准其回籍省看墳塋部署一切再行赴滇候補賜詩曰差往緬屯因被羈今知悔罪送還爲兵傳後實非佳也

事貴先聲信有之癘地瘴海憐久汝冰天雪窖豈殊其設如此
擬伊家武無子無妻謂過伊翌日

賞大緞二疋令馳驛回滇又

諭曰連日命軍機大臣詢問蘇爾相據所稱情節與得魯蘊極
爲熟識幾成交好因思得魯蘊等如果到關進貢還人彼時李
侍堯自應差委委員至關口與之接見交言莫若即令蘇爾相
承辦此事爲妥因即令蘇爾相馳驛回滇聽李侍堯遇缺補用
以資調度並令軍機大臣諭知蘇爾相如果得魯蘊到關進貢
即令蘇爾相前往接受爲之明白宣諭令其隨貢進京瞻覲即
著蘇爾相伴送來京蘇爾相既與得魯蘊相熟所言自必深信
不疑如得魯蘊到時朕必格外加恩並加恩蘇爾相昨曾令其
回原籍看視且俟此事辦完再令隨便告假回家八月到滇十
月奏補鶴麗鎮遊擊四十二年六月

諭曰上年秋間蘇爾相到京朕念其在緬羈留日久加恩陞用
遊擊並令其回籍看視嗣因其與得魯蘊相熟恐得魯蘊到關
進貢應令前往接受伴送來京是以令其俟事畢回籍今當盛

夏邊地瘴發現無可辦之事著傳諭裴宗錫即令蘇爾相乘此閒暇之時酌給假期回籍看視於冬間再行赴滇七月雲南巡撫裴宗錫奏據蘇爾相稟稱緬匪進貢還人之說尙在觀望恐有信到關伊與得魯蘊熟識易於交言集事請仍留職守俟邊事辦畢再回籍省視

上是之四十七年四月經總督富綱保薦四十九年正月請加銜補用

諭曰富綱奏遊擊蘇爾相老成歷練熟習邊情現在駐防沙木籠未得送部引見請賞給參將職銜俟有缺出奏補以示鼓勵蘇爾相駐守邊防得力是以俯允所請嗣後不得援以爲例七月陞署順雲協參將五十一年實授五十二年陞龍陵協副將五十六年保列一等閏四月赴部引

見奉

旨蘇爾相准其一等註冊翌日

召見

賞戴花翎及大緞二疋五十八年授鶴麗鎮總兵六十年三月

調騰越鎮總兵嘉慶元年同巡撫江蘭勦辦威遠猓黑殲斃首
犯札那及餘匪數百名十二月奉

旨兼署提督生擒首犯札杜並勦戮猓匪一千三百餘名威遠
平四年隨總督富綱勦辦緬寧猓匪帶兵攻克南洒河黃草壩
丙別青龍山壩卡等處賊寨經總督協辦大學士書麟奏

聞

賞喜字玉搬指大小荷包五年奏留緬寧辦理善後事宜旋因
傷發回鎮調理卒於保山縣之右甸鄉子天貴元年廕生引
見以主事用籤分刑部行走因奏明無籍可歸奉
旨准入雲南永昌府保山縣籍

卷五十七

滿漢大臣列傳

卷五十八

竇光鼐

閻循琦

竇 璜

吳虎炳

竇光鼐山東諸城人乾隆七年進士改庶吉士散館授編修十三年正月充會試同考官六月大考四等罰俸一年八月擢左中允十五年充山西鄉試副考官十六年遷翰林院侍讀十七年二月擢侍讀學士六月大考一等擢內閣學士入直南書房充湖北鄉試正考官旋提督河南學政十八年丁母憂二十年服闋授左副都御史尋提督浙江學政二十二年
上南巡有臨海縣訓導章知鄴以光鼐不准進獻詩冊欲圖許告經光鼐訪聞參奏

諭傳赴宮門考試旋以該訓導詩詞俚鄙且檢閱呈內有西陲用兵久稽成功情願從軍等因

命革知鄴職派侍衛伊德解往巴里坤軍營効力

賜光鼐詩曰兩浙山川常毓秀諸生月旦汝司文從來士習民成俗曷彼行知尊所聞見外發中務清正涵今茹古去纖紛曰

公似矣曰明要籲俊紆予一念殷二十六年八月九卿秋讞會
議光鼐以廣西省犯追賊毆斃之陳父悔不宜入情實貴州省
犯逞兇斃命之羅阿扛不宜入緩決兩議具請刑部奏入
諭曰昨刑部奏九卿會審將廣西省陳布統案內之陳父悔改
入情實而竇光鼐立意兩議之處具摺奏聞已有旨傳諭該堂
官等令其虛心持正定議不必彼此徒事爭執今復據奏稱竇
光鼐將本案故殺之陳布統並欲改入緩決並將貴州省羅阿
扛一案牽引比擬並抄錄原簽附摺具奏會讞大典理應虛公
覈定果有擬議未協不妨平心商確務歸明允即使意見不能
強同原可兩議具請候朕酌奪今觀竇光鼐議帖因己見參差
竟至以筆舌忿爭嘵嘵不已此等習氣在前明弊政時視爲固
然以致各立門戶大壞朝政今當紀綱肅清之日一切案牘朕
無不折衷裁處竇光鼐豈得逞臆侈談口說致乖政體但簽內
稱刑部刪去黃父防赴村探聽一節則係本案是否竊賊要據
招册何以不入又羅阿扛一案何以定議緩決與前案輕重不
符以竊賊殺人而議緩何以服守禾殺賊而改實者朕觀竇光

鼐雖不無氣質用事口舌紛爭之失而刑部先後兩奏跡似豫爲張本其中情節曲直亦或有不足服竇光鼐之心者著將各摺交與大學士來保史貽直協辦大學士梁詩正將兩案審擬各原稿詳悉確覈秉公定議具奏來保等議以陳父悔係隨衆加毆應改入情實而陳布統之有心斃命與羅阿扛之無心鬥殺均應悉如部議且刑部稱此二案竇光鼐業已畫題何得又請改擬奏上

上命光鼐明白回奏尋奏陳布統羅阿扛兩案異議處本係簽商並非固執因會議時言詞過激致相牴牾刑臣遽將簽出未定之稿先行密奏臣未能降心抑氣與刑臣婉言咎實難辭請將臣交部嚴加議處

諭曰此事在刑部以兩議未奏之案節次具奏誠未免有先發制人之意但國家會讞大典竇光鼐竟氣質自用甚至紛呶謾罵而不自知設將來預議者尤而效之於國憲朝章尙可爲訓耶是刑部有所不合究不若竇光鼐之甚竇光鼐著交部嚴察議奏刑部堂官著交部察議竇光鼐摺并發部議降三級調用

命銷去降二級仍降一級留任十月奏事主擅殺竊盜律止杖
流近來各省問刑衙門多以竊盜拒捕而被殺比罪人不拒捕
而擅殺皆以鬥論遂于律應斬決斬候之賊犯致有輕縱而例
得勿論及罪止杖徒之事主並擬絞抵殊非禁暴之意應請各
遵律例及新准御史蔣嘉年條奏賊犯持杖拒捕者格殺之不
論事主鄰佑俱照律勿論例畫一辦理下部議行十二月
諭曰朕前此南巡有浙江臨海縣訓導章知鄴以學政竇光鼐
不准進獻詩冊妄欲捏詞叩閣經學政等訪聞參奏當令革職
命侍衛伊德帶往闕展効力俾伊悉知軍營情形果如所言否
比因軍務久竣此等無知之人別無効力之處因傳諭安泰查
伊在彼果能痛加懲警安分悔過卽傳旨加恩令其回籍如有
字蹟卽一面看守一面奏聞另降旨定奪乃據查到章知鄴筆
札記載叢雜乖張如妄引關帝文昌鬼神夢嚙之談已足爲人
心風俗之累然其詞猶不過止於荒誕至所著討奸邪竇光鼐
一篇則竟捏造悖逆之言一皆託諸竇光鼐之口伊轉爲之加
以駁詰是其居心奸險計圖栽害此等如鬼如蜮伎倆豈能逃

朕洞鑒乎竇光鼐不過一庸懦之人且現在居官斷不敢爲此
即使竇光鼐果有此言亦初未必筆之於書也而章知鄴則已
明目張膽公然列之於著錄實惡逆之尤著將該犯章知鄴卽
於闡展地方正法示衆以儆奸頑並將此通行傳知之二十七
年三月奉

旨竇光鼐識見迂拙不宜副都御史之任著以對品另用十一
月

命署內閣學士告祭南海二十八年充殿試讀卷官二十九年
授順天府府尹三十二年丁父憂三十五年三月服闋補原官
五月奏童生冒籍必交通廩生廩生之優劣惟憑教官申送易
滋弊竇查府丞一官承辦事件無多應責成實心查覈其入籍
滿二十年者令族親隣佑各具甘結如查察不實將具結人一
併治罪再審音時例派滿漢御史遇可疑者飭該縣確查詳覈
查覈不實例處該縣如未經駁查事後發覺將御史一併議處
冒籍既清應試者少其有事故不及與府縣試者應照鄉試錄
遺之例於案臨之先府丞移會御史彙齊補考如不符取額寧

闕毋濫下部議行閏五月因武清東安二縣飛蝗蔓延不能率屬搜捕奉

旨降爲四品京堂仍交部嚴加議處部議上

命於補官日降三級從寬留任六月奏武清等處蝗蝻業經查捕淨盡新授府尹裘曰修現赴天津捕蝗謹差官齎送印信適聞三河懷柔二縣俱有飛蝗擬卽日往捕得

旨准其前往復奏近京州縣旗地多於民地請嗣後捕蝗令民人佃種旗地者一體撥夫應用

硃批所奏是著照所請速行尋

諭曰前據竇光鼐奏民人佃種旗地之戶請一體撥夫撲捕蝗蝻一摺因其所奏近理卽批交部照所請行並諭地方偶遇捕蝗不獨旗佃與民田通力合作卽大糧莊頭亦應一體派撥其直隸向來作何辦理著楊廷璋查明具奏及派往捕蝗之侍衛索諾木策凌等回京詢其實在情形據稱所到之處不獨旗佃出夫辦公卽王公所屬旗人亦悉力協捕等語旋據該督奏覆自方觀承任內設立護田夫一項不拘旗民均令出夫現仍照

舊辦理因節次令竇光鼐明白回奏竇光鼐堅執臆見謂詢之
三河順義兩縣及東路同知皆云旗莊並不出夫卽周元理亦
有旗庄不肯借口袋之語曉曉置辯因復降旨楊廷璋令將
所奏情形再行覆查今竇光鼐到京回奏則以前此所說護田
夫未經奏明不能一體遵照爲詞其說支離更甚試問總督舊
定章程通行闔省順屬官民豈能獨不遵條教府尹亦豈得諉
爲不知况竇光鼐所指三河順義二縣卽係府尹所轄如有司
陽奉陰違自當隨時參劾卽無此例而府尹奉差捕蝗亦理應
派夫護田其有佃戶人等倚恃旗業聲勢不受約束竇光鼐既
目擊其情無難詢明何人莊業列名指參卽如大學士傅恒尹
繼善外如總督楊廷璋推而上之以至親王等皆無可畏忌竇
光鼐若早據實舉出朕必且深爲嘉予並將袒庇莊佃之王大
臣嚴加議處乃並不能指實一人而徒硜硜膠執不已於事何
當其意不過欲借題發揮逞弄筆墨妄以強項自命冀見許於
無識之徒且以總督楊廷璋既不無瞻狗旗莊卽承旨之軍機
大臣有旗產者亦未免意存袒護以此曲爲解嘲自文其過此

等伎倆豈能於朕前嘗試乎因令寶光齋隨軍機大臣進見面
爲詢問亦自稱在三河順義不行指名具奏實屬無能難以再
爲支飾近京旗民交涉事件在國家初定鼎時或有旗人強佔
民地及將各項差派專委居民承辦者今閱百數十餘年屢經
整飭政紀肅清無論旗莊各戶不敢不安分守法卽王公大臣
亦不敢怙勢庇佃欺壓平民自圖詭避差役而國家法在必行
又豈肯聽其縱越禮法稍爲曲徇乎朕辦理庶務一秉大公至
正中外臣民宜無不共見共知卽此事之是非曲直適就前後
事理爲衡斷並未嘗豫設成見而竇光鼐偏謬邀名之隱微亦
不能逃朕洞鑒特爲明白宣示將此通諭知之七月奏護夫之
法有不可行者查原議三家出一夫免其門差臣按冊計之大
宛二縣約出夫七千五六百名此數千人巡捕半年荒廢本業
衣食無資造冊免差胥吏必緣以爲奸且捕蝗宜衆而時速若
按三家一人之例必致緩不及事臣謹上捕蝗事宜數條一人
夫不必豫設但查清保甲臨時酌撥一必用本村近地之人方
得實用一牌頭按村之大小酌設每縣不過數十名一各村田

野令鄉地牌頭勸率田戶自行巡查一蝗蝻生發一面報官牌頭卽率居人齊集往捕撲滅者賞隱匿者治罪一器莫善於條拍宜豫製以便應用一蝻子宜開溝圍逼加土掩埋一收買之法止宜用之老幼婦女若精壯之人總以直前追捕爲得力諭曰據寶光鼐回奏派撥旗莊人夫一事請將順義縣知縣王述曾三河縣知縣周世沅解任并傳東路同知劉峨北路同知張在赴軍機處質問等語所奏膠執支離尤屬不曉事理此次直屬撥夫捕蝗無論地方官原係循照舊規旗莊民田均勻派用卽如寶光鼐所云旗莊之夫或出或否到場難而較遲據此已足爲均派之明驗更何事嘵嘵置喙雖該督楊廷璋查詢時該同知知縣等稍爲遷就其屬亦屬情理所有於事本無關緊要若因語言傳述參差小節遽令兩縣兩廳同時解任徒致曠廢公務殊覺無謂設因此數人赴質之故併將寶光鼐褫職對簿又復成何政體且亦不值如此張大其事至寶光鼐另摺所稱護田夫一項以若輩盡力巡查且至荒廢本業彼爲鯁鯁過計以衣食無由取給爲虞所見更爲迂鄙護田夫之設不過令

於蝻子萌生時各隨本處田地搜查或遇蝗孽長發會力撲捕
並非使之長年株守田畔於三時農業行拋棄也卽如設兵防
守汎地亦第於汎內輪番偵邏稽查又豈責其終日登高瞭望
方爲斥堠若如竇光鼐之論直是跬步難行有不聞而失笑者
乎竇光鼐前此覆奏惟知因事借題造作塵腐空文自爲解嘲
地步今又將派夫一節連篇累牘鋪張條奏而於事體之可行
不可行全無理會其拘鈍膠羈之處正復不勝指摘猶且終始
堅執臆說牢不可破向固知其僅一硜硜之小人毫無能爲乃
不意執迷紕繆若此且以空言折辯互相指斥漸成門戶乃前
明陋習此風斷不可長竇光鼐著交部嚴加議處八月革職十
二月

諭曰竇光鼐前因捕蝗一事照部議革職但究係拘鈍無能尙
無大過所有通政司副使員缺著加恩令其補授三十八年四
月擢光祿寺卿六月遷宗人府府丞八月稽查右翼宗學三十
九年

命告祭吉林等處四十五年充福建鄉試正考官四十七年五

月授浙江學政四十九年

上南巡

賜詩曰士習民風首端方繫厥司况茲文盛處所重行修時熟路輕車試迪人克己爲前車應鑒已自立尙勤思五十一年正月擢吏部右侍郎是年查辦浙江虧空四年光霽奏浙省各州縣倉庫虧缺未補者多蓋因從前督撫陳輝祖王宣望貪墨敗露時督臣富勒渾並未徹底查辦祇據司道結報之數渾同立限遇有陞調事故輒令接任之員出結辦理顛預臣聞嘉興府屬之嘉興海鹽二縣温州府屬之平陽縣虧數皆逾十萬當查何員虧缺分別定議去歲杭嘉湖三府歉收倉內有穀可糶者無幾浙東八府歲行採買惟折收銀兩以便挪移奏入

上嘉其公正

命尙書曹文植侍郎姜晟前往會同巡撫伊齡阿徹底清查嚴參辦理又

命光霽會同查辦五月奏仙居黃巖等七縣前任知縣虧空數目多至累萬全未彌補以後任不敢接收交代永嘉縣知縣席

世維借生監穀輸倉備查平陽縣知縣黃梅借虧空名色科歛累民丁憂演戲殊非人類仙居縣知縣徐延翰監斃臨海縣生員馬寘殊干法紀再藩司盛住上年進京攜貲過豐外間頗有煩言又督臣過往嘉興嚴衢上下游地方供應浩繁門包或至千百奏入

上命大學士阿桂由南河馳驛赴浙江督辦尋復奏盤查過海鹽桐鄉嘉興等六州縣倉穀有缺數百石至百餘石者惟桐鄉縣倉內實無儲穀所有之穀借自社倉又將米三千石開報平糶掩飾一時再查范公塘二工向派各州縣承修請嗣後責成海塘大員督率海防同知承修再於沙灘地多栽蘆葦三年以葦易柴取用甚便

上命阿柱與曹文埴等逐一覈辦

諭曰據阿桂奏查詢倉庫情形及竇光鼐所稱盛住上年進京攜帶過豐各節已於摺內詳晰批示如竇光鼐原奏永嘉平陽二縣借穀勒派之事阿桂面詢該學政係何人告知該學政不能記憶姓名是竇光鼐既欲於朕前見長又恐得罪衆人實屬

進退無據至所稱盛住進京攜帶銀兩及總督收受屬員門包各節詢之學政亦不能指實阿桂等傳詢盛住則因上年進京時有應解淺價銀三萬九千餘兩盛住自行裝匣攜帶到京後卽赴廣儲司兌交有案是盛住攜帶銀兩係屬官物豈可指爲贓私之証而竇光鼐因見所帶銀匣數多遂疑盛住私貲若如此疑人天下無一清廉之官矣尤爲可笑至總督藩司收受屬員門包餽送事關大員婪索若無確據何得率行陳奏乃詢問該學政毫無指實是竟係信口誣人若竇光鼐欲誣人謀反不論其實有無將人治罪有是理乎此案若非朕特派阿桂前往查辦則竇光鼐與曹文植等爭執攀引即經年之久辦理亦不能完結更復成何事體今阿桂與曹文植等公同面詢逐層駁詰俱確有可據竇光鼐竟不能復置一詞現復檄調嘉興府屬州縣質詢自可無難得實至富勒渾家人在粵招搖滋事及在浙有無勒索門包之處阿桂現在提集富勒渾進京時經過之嘉興嚴衢各地方官到省愷切開導令其據實供出該州縣知事難掩飾自必和盤託出所辦尤爲得其要領七月阿桂等奏

查明永嘉平陽等縣實無挪移勒派之事平陽縣知縣黃梅丁
憂演戲一節查係該縣爲伊母慶九十生辰於演戲之夜痰壅
猝故

諭曰據阿桂等查明黃梅爲伊母演戲慶壽伊母於是夜痰壅
身故是其演戲在未丁憂之前況伊母年已九旬風燭無常猝
然身故亦屬情理所有此事關係名節竇光鼐輒行入告並不
確細訪查若此事果實則真如原奏所稱行同禽獸不齒於人
類矣該學政不顧汚人名節以無根之談冒昧陳奏實屬荒唐
竇光鼐著嚴飭閏七月復奏前任仙居縣知縣徐延翰監斃生
員馬寘各上司展轉徇庇並未審出實情

諭曰朕詳閱此案情節馬寘身爲生員夥合匪徒陳天河邵能
文等向各僧寺弔紙圖謝又嫌謝錢數少誣首賭博復與僧人
鬪毆實屬膠庠之敗類其罪亦應滿徒該縣徐延翰將馬寘掌
責收禁並無不合至馬寘在監病故屢經驗明確實係死于病
非死於傷其徐延翰倒填詳報月日又不關傳屍親眼同相驗
收斂規避諱飾之咎實所難辭將來議處尙不止於革職亦足

以服屍親之心乃竇光鼐必欲加該縣徐延翰以故勘濫禁因而致死之罪並將參奏摺與曹文植閱看聲言汝辦理此案若不將徐延翰照故勘濫禁治以重罪我必將汝參奏並令告知阿桂伊齡阿等語是其袒護劣衿偏徇己見不知其自之狂妄若此設如所言將來劣生必致武斷鄉曲目無官長適足以成惡習而長刁風尙復成何政體耶又竇光鼐覆奏平陽縣黃梅母喪演戲係闔邑生童所言及平陽虧空自黃梅始該員以虧空之多久居美缺縱令伊子借名派索濫用而抗不彌補且指阿桂等於議處虧空各員未將黃梅從重辦理等語浙省虧空一案業經阿桂等查辦完結將乾隆四十三年以前歷任各員擬以革職暫行留任按照在任月日分賠勒限一年不完照虛出通關律治罪黃梅之罪亦與他州縣相仿若獨予從重不特無以服其心天下有此辦事之法乎至所奏母喪演戲一節前經查明係本年正月黃梅爲伊母慶九十生辰演戲伊母一時痰壅適於是夜猝故而竇光鼐尙固執前言夫人子即忤逆不孝母死不知悲哀亦斷無迫不及待於母死之日演戲爲樂者

況黃梅之母年已九旬風燭無常於演戲之夜猝然身故亦屬情理所有此事關係名節古云善善欲其長惡惡欲其短竇光肅係讀書之人亦何心汚人名節致禽獸之不若耶據稱派往之司員海成爲地方官所蒙今伊竟親自赴平陽訪查如果能查明自當另辦若至生事凌夷地方官是伊自取咎耳且阿桂曹文埴伊齡阿屢蒙任使皆係素能辦事之人朕之信竇光肅自不如信阿桂等卽令竇光肅反躬自問亦必不敢自以爲在阿桂等上也今竇光肅之固執己見嘵嘵不休者以爲盡職乎以爲効忠乎且竇光肅身任學政校士是其專責現當賓興大典多士守候錄科平陽去省往返二千餘里該學政必欲親往訪查而置分內之事於不辦殊屬輕重失當且其固執辯論意在必伸其說勢必蹈明季科道盈廷爭執各挾私見而不顧國是之陋習不可不防其漸竇光肅著交部議處並將此通諭知之又

諭曰前據竇光肅奏平陽縣知縣黃梅丁憂演戲一事該府范思敬曾面稟前撫臣福崧以接任之員不受交代俟查明嚴參

又該員虧空之數甚多抗不彌補調任温州府方林亦嘗赴省謁參等語當卽降旨詢問福崧茲據福崧奏稱在浙時並未聞有黃梅丁憂時演戲之事該府范思敬亦未面稟至虧缺之案時刻嚴催僅據該府方林等以催迫太甚誠恐有累閩閩稟請展限亦未據謁報等語是此事范思敬等從前並未具稟福崧何以竇光鼐稱曾稟福崧竟似福崧亦知其事竇光鼐惟以先入之言爲是不加詳查率行誣攀瀆奏其意何居著將福崧原摺發與竇光鼐閱看令其據實明白回奏勿再仍前固執自干咎戾也部議以光鼐袒庇劣生擅離職守例應革職撫臣伊齡阿參奏光鼐於未到平陽之先差人招告既到則招集生童發怒咆哮用言恐嚇並勒寫親供鎖拏書役用刑逼喝

諭曰生監把持唆訟學政方將約束之不暇而竇光鼐乃招告于未到之先逼嚇於既到之後咆哮發怒紛紛若狂實屬大辜厥職若生監等因此挾制官長顛倒是非適足以長惡習而助刁風而竇光鼐執意妄行竟是以生監筆據爲驗是其舉動乖張督亂朕亦不能爲之曲庇矣竇光鼐科分較深學問亦佳從

前未經陞用卽因其性情偏執遇事輒挾私見是以遲遲耳近
念其學問尙優歷俸最深仍用侍郎留學政之任理宜安分守
職承受朕恩乃於浙省一案執辯不休無故陷人於悖逆名節
有虧之事今復招集生監遍令指實而置目前錄科之事于不
辦徒令闔省生監守候多時幾誤場期如此若再姑容則何以
爲曠職生事者戒竇光鼐著交部議處部議革職伊齡阿復奏
光鼐在平陽縣城隍廟多備刑具追究書吏生監平民一概命
坐及由平陽回省攜帶多人曉曉執辯

諭曰此事之始朕因竇光鼐爲該省學政適該省有虧空之事
因令就所見聞陳奏此朕明目達聰兼聽並觀之意耳卽使所
言不實亦祇係風聞入奏斷不以此遽加之罪今伊所稱黃梅
丁憂演戲等款皆節外生枝況業經阿桂等審係竇光鼐誤聽
虛誣朕亦未加之譴責竇光鼐當知感激朕恩安靜供職乃現
屈賓興大典多士在省城守候錄科伊竟親赴平陽咆哮生事
而置目前錄科之事於不辦是以將伊革職此竇光鼐自貽伊
戚其罪並不在於言事不實也茲復據伊齡阿奏竇光鼐回省

攜帶丁憂典史及生監等多人，以爲質証。且言不欲做官，不要性命等語。看來竇光鼐竟係病瘋，是以舉動顛狂。若此，伊於黃梅丁憂演戲一節，始則誤聽人言，欲以忤逆不孝之事污人名節。今赴平陽訪係此事，屬虛復言。黃梅任內，另有別項欸蹟，以實其說。如此乖張，督亂不但有乖大臣之體，且恐煽惑人心，以致啟生監平民人等，訐告官長，效尤滋事之風，不可不嚴行懲儆。僅予革職不足蔽辜。竇光鼐著拏交刑部治罪。光鼐尋奏臣親赴平陽該縣紳士民人呈送五十年派捐田單二百餘張，供稱知縣以彌補虧空爲名，計畝派捐每田一畝捐大錢五十文，給官印田票一紙，與征收錢糧無異。又呈送借票九張，共計大錢二千一百千，又四十四年四十七年兩次勒捐富戶自一百餘千至三五千不等。每歲採買倉穀並不給價，有飛頭印票穀領朋帖各名色。該縣在任八年，所侵吞穀價與勒捐之錢計贓不下二十萬。且於頒賞老民錢及廩生廩餼亦未給發。至其母喪演戲，緣欲緩報丁憂，借演戲以便催糧。家人竊物外逃，事遂洩漏。邑人皆知。今將田單印票飛頭穀領朋帖催帖借票各

揀一紙進呈

諭曰前據伊齡阿奏竇光鼐回省攜帶生監多人以爲質證舉動顛狂且恐煽惑人心啟訐告抗官之漸是以降旨將竇光鼐拏交刑部治罪今觀竇光鼐所奏又似黃梅實有勒派侵漁之事且有田單印票借票朋帖各紙確鑿可據豈可以人廢言前因浙省勒限彌補虧空恐該州縣中有不肖之員藉端勒派擾累閭閻屢降諭旨飭禁今黃梅借彌補勒捐既勒捐乃不彌補以小民之脂膏肥其慾壑婪索不下二十餘萬似此貪官汚吏而不嚴加懲治俾得漏網吞舟不肖之徒轉相效尤於吏治大有一關係若竇光鼐果有賄買招告及刑逼取供各情節一經質訊得實則其獲戾更重今觀其呈出各紙此事不爲無因又有原告吳榮烈等隨伊到省願與黃梅對質若朕惟阿桂曹文植伊齡阿之言是聽而置此疑案不明白辦理不但不足以服竇光鼐之心且浙省現值鄉試生監雲集衆口藉藉將何以服天下輿論此事關係重大不可不徹底根究以服衆懲貪阿桂現已起程在途接奉此旨仍著回至浙江秉公審辦此時竇光鼐

自己由浙起解阿桂於途次遇昂將伊帶回浙省以便質對
此案若止派阿桂伊齡阿受朕愆爲大學士自不肯心存回
護但究係原審之人著添派閱覽元會同審辦閱鶚元係科目
出身久任巡撫辦事認真且籍隸浙江見聞更爲真切自當秉
公無所回護該撫現在江寧監臨鄉試著布政使長麟馳驛前
往代辦監臨事宜閱鶚元卽回至蘇州候阿桂經過時一同馳
往務將寶光鼐摺內所奏勒派金黷各欸逐一根究其稱黃梅
緩報丁憂借演戲以便催糧似非人情所有且此案內緊要關
鍵亦不止此阿桂閱鶚元總須收黃梅勒捐派累實在情形審
訊明確且寶光鼐進呈田單印票飛頭穀領收帖催帖借票各
件俱係黃梅勒派借及採買倉穀不發價值虛填收領確實憑
據寶光鼐進呈者不過每樣各檢一紙其存留浙省者甚多以
此觀之則伊齡阿不免爲屬員所欺矣此事却有關係欺伊齡
阿尙可朕與阿桂可受其欺乎必應審明朕不回護惟有大公
至正而已閱鶚元亦應如此阿桂等到彼止須就此各項字帖
並弔齊控案逐款根究卽無難水落石出況票內一半鈐有官

印及伊私用圖印斷非捏飾黃梅如果有此種種劣蹟卽應審明定罪以儆奸貪不可顛預完結致滋物議也九月

諭曰前因浙省倉庫虧缺不能依限彌補特派大臣前往查辦並因竇光鼐爲該省學政見聞較切因令就所聞見據實陳奏此朕兼聽並觀之意嗣據竇光鼐覆奏浙屬之嘉興海鹽等縣倉庫虧缺浮於報明之數並以平陽縣知縣黃梅丁憂演戲列欸入奏朕以其不避嫌怨曾褒其公正迨阿桂等查明該省虧缺較原有之數有減無增所參黃梅欸蹟謂係竇光鼐誤聽人言實無其事而竇光鼐執辯不休且據伊齡阿兩次參奏竇光鼐自赴平陽招集生監逼寫親供咆哮生事其時朕以此案業經阿桂等審明竇光鼐固執己見聚集生童招告恐煽惑人心致啟訐訟之風竇光鼐不得爲無罪是以將伊革職拏問此政體國法必當如此辦理非朕之憎竇光鼐也嗣復據竇光鼐將黃梅貪黷欸蹟逐一查出並將借票捐單呈覽職欸確鑿是其言並非無據而阿桂等前此在彼查辦竟爲地方官瞞過伊齡阿又復聽信屬員一面之詞受其慫恿遂而冒昧參奏不可不

徹底根究因卽降旨將竇光鼐寬釋令阿桂帶同竇光鼐回至浙省並派閔鶚元會同前往查辦茲據阿桂等將黃梅在任婪索各欸嚴切審訊黃梅勒借吳榮烈等錢二千一百千文又侵用田單公費錢暨朋帖採買錢一萬四千餘千文而於原報虧缺穀價僅彌補四千餘兩仍未依限補足是竇光鼐所奏惟黃梅匿喪演戲及侵用廩生餼糧並短發老民銀兩三款屬虛其餘三款已爲確實是伊從前冒昧固執之咎尙屬可寬現在陸錫熊已出學差所有光祿寺卿著加恩令竇光鼐署理卽行來京供職至黃梅於乾隆四十三年調任平陽縣在任八年種種貪黷營私歷任上司漫無覺察實難辭咎但四十三年以後浙省督撫如王賈望陳輝祖俱已另案治罪法無可加惟福崧在巡撫任已歷數年乃於此等劣員畝法侵貪並不據實參奏豈可復膺封疆之任前任藩司盛住所屬州縣錢糧是其專責伊在浙較之福崧尤爲最久亦復置若罔聞姑容闕冗是盛住亦不應仍任織造伊等現交部嚴議自係革任革職難逃寬宥福崧著先革翎頂盛住亦著革去翎頂俱著來京候旨至伊齡阿

於黃梅婪索一案雖非其任內之事但輕聽屬員之言兩次將竇光鼐冒昧參奏是其錯謬伊已自請交部嚴加議處著在任聽候部議其餘失察之各上司俱著交部查取職名分別嚴加議處朕辦理庶務一秉大公至正總其案情覈實從不稍存成見諸臣功過惟視其人之自取除將阿桂等審擬一摺交軍機大臣會同行在該部覈議具奏外將此通諭知之尋奉

旨阿桂曹文植姜晟伊齡阿俱著交部嚴加議處十月授宗人府府丞仍署光祿寺卿事務十二月部議光祿寺供奶餅缺額降一級留任五十四年四月充殿試讀卷官六月擢禮部侍郎奏安徽學政編修徐立綱人品聲名平常

詢督臣書麟撫臣陳用敷有據降立綱以司務博士等官用是月充浙江鄉試正考官八月提督浙江學政五十五年奏近年文體漸靡皆由肄習講章讀坊刻時文所致臣通飭各學講求傳注反諸身心體念聖賢立言之旨以前輩文爲楷式以易書詩三經春秋左傳史記前後漢書五代史及昭明文選唐宋大家古文彙爲月課分月註冊考課功過

上嘉之五十七年七月擢左都御史十一月

命在上書房總師傅上行走五十八年四月充殿試讀卷官五十九年八月充順天鄉試正考官十二月充經筵講官六十年三月充會試正考官四月

諭曰朕辦理庶務往往

天隔朕衷幾先洞燭本年會試榜發第一名王以銜係浙江人二名王以銜亦係浙江人朕披閱之下以各直省應試舉子不下數千人豈無真才足拔王以銜王以銜同籍聯名儼然兄弟恰居前列殊覺可疑茲據欽派大臣將覆試各卷分別等第進呈第二名王以銜覆試列在二等第四高下尚不相懸其王以銜竟列在三等七十一名朕親加披閱疵類甚多派出大臣校閱甚爲公當且據磨勘大臣奏稱王以銜會試中式之卷第二藝參也魯比內用一日萬幾一夜四事等字樣於先賢身分尤爲引用不切似此膚泛失當之卷何以拔置第一且所擬策題紕繆處甚多該考官等於掄才大典漫不經心殊非慎重衡文之道竇光鼐人本拘迂不曉事體朕夙聞其於時藝一道尙能

留心講習是以派爲正考官不意其糊塗錯謬一至於此且初九日主考出闈復命召見時寶光齋不特奏對不明跪起兼至傾跌是其年老昏瞶豈可復膺風憲之任除副考官劉躍雲瑚圖禮及薦卷不當之同考官等卽照和坤等所請交部嚴加議處餘著照所擬分別辦理外寶光齋著卽解任聽候部議尋予四品銜休致九月卒

閻循琦山東昌樂人乾隆七年進士改庶吉士十年散館改主事十二年補工部都水司主事十三年充琉璃窑監督十八年五月充木倉監督七月遷員外郎十九年充寶源局監督二十一年推陞禮部郎中奏留工部二十二年遷廣東道監察御史仍兼工部行走八月奏言江南山東等省被水成災之處撫賑折給銀兩按照戶口秤定銀封以便給發而該管官往往假手于家人胥吏勢不能免扣減之弊甚至官吏通同暗用輕戡宜令督撫於府屬佐貳或鄰封協辦州縣中派委專員監封仍飭令道府各官不時抽驗以除弊竇至貧民領銀易錢買米謀利之徒高擡錢價改用重戡貧民不能不受其剝削應令隨時稽

察明白曉諭以除奸民牟利之弊再鄉城富戶每囤積錢文經久不行散易囤積日多斯流通愈少亦應令悉行散易以平市價

諭曰御史閻循琦奏撫卹事宜一摺頗爲切中情弊若但將各款條晰明降諭旨其本屬不肖者未必因此而遽生畏憚而本無此弊者或轉因此啟其舞弊之端是本欲止奸而適以導奸矣著將該御史摺鈔寄各省督撫令其留心體察不必明降諭旨著在京總理大學士傳諭該御史知之二十三年奏八旗義學教習月給銀米三年期滿以知縣教職分別錄用自應朝夕訓迪方爲無忝厥職乃近聞並不實心督課甚至另覓私館別受修脯每月初二十六到學片時卽散雖例由禮部派員稽察然有虛名而無實事請嗣後做照覺羅官學之例每年

欽派大臣會同禮部堂官嚴行稽察務令該教習各專其功以生徒之優劣定教習之勤惰庶肄業子弟得受訓誨之益

諭曰國家設立學校原以教育人材今觀八旗義學徒有學校之名而無育才之實況有咸安宮國子監官學並教養世職官

員左右兩翼官學八旗讀書人等儘可學習將義學裁去仍交管咸安宮並各官學之大臣盡心教習不可有名無實二十四年掌京畿道監察御史二十五年復充琉璃窯監督二十七年授坐糧廳二十九年回工部任三十年五月以失察工部冒銷案解任尋釋仍以原銜留部三十一年五月補福建道監察御史十一月遷吏科給事中三十二年轉吏科掌印給事中尋派總理三殿大工三十四年十二月

特命兼吏部文選司郎中事旋擢內閣侍讀學士仍兼吏部行走三十五年署工部右侍郎三十六年三月充會試知貢舉尋補左侍郎三十七年兼署刑部侍郎三十八年遷工部尚書命赴盛京查辦戶部侍郎兼管順天府府尹瓦爾達狗庇錦縣知縣圖爾炳阿寬縱正犯事鞫實又究出瓦爾達恃勢侵占民地等情按律治罪四十年十一月

賜紫禁城騎馬十二月卒

諭曰工部尚書閣循琦老成練達宣力有年洵歷正卿正資倚任前以染患膈噎特頒內府藥餌令其加意調攝冀得速痊茲

聞溘逝深爲軫惜著加恩晉贈太子太保並派散秩大臣一員帶領侍衛十員前往奠醊所有應得卹典仍著該部察例具奏

尋

賜祭葬諡恭定子學淳原任江南淮揚道學海現任內閣中書寶璜山西平定州人乾隆七年武進士授藍翎侍衛十二年遷江西瑞州營都司十六年調鉛山營都司十九年遷福建陸路提標後營遊擊二十年調雲霄營遊擊二十四年遷同安營參將二十八年調臺灣城守營參將二十九年遷浙江紹興協副將三十四年擢山東登州鎮總兵三十六年四月奏稱登州水師一營分爲三汛向例每年均演習水操一次北汛係總兵親驗南東二汛委副將就近查閱竊恐同寅瞻徇情面難以認真不若俱行親查更爲嚴密除北汛就近操驗外其東南二汛請照陸路通行親查之例前往閱看並請將火箭火罐噴筒等項照備貯藥鉛出陳易新之例輪製如法每年隨操試演上從之三十八年調貴州古州鎮總兵兼署提督

諭曰前因古州鎮總兵出缺令寶璜調補仍兼署貴州提督古

州爲苗疆要缺一切控馭撫綏必須大員妥爲經理至現在川省軍營尙有添調黔兵之事提督一缺亦關緊要著竇璜卽速赴古州新任三十九年六月疏稱黔省各營兵丁內有本姓張而頂食姓李名糧者遇有事故牽混難查概令更正各將備嗣後召募新兵必須實在姓名方准挑驗虛冒參處又查營中利器鎗礮弓箭皆能致遠一遇衝鋒面敵藤牌實不可少黔省牌兵於乾隆二十七年裁改但前征緬匪以藤牌便爲短接每名名調取五名今進攻金川復需藤牌擋石奪礮是藤牌仍宜復舊請按照福建跳舞對打之法用真實鐵器親加教練每兵百名復設藤牌七名

上允之四十年五月

諭曰貴州調赴川省之兵在軍營最爲得力是以明降諭旨格外優賞但該省地係苗疆恐營中存兵較少不足以資彈壓竇璜現署提督苗疆重任乃其專責不可不加意經理苗民久遵王化果能駕馭得宜自皆寧帖至附近苗疆防守兵丁俱應選補足額仍宜隨時訓練嚴飭兵役勿稍需索滋擾則苗衆自各

相安仍以此次加賞赴川兵眷錢糧之事曉諭在營各兵使倍知觀感鼓舞該提督辦理此事尤宜不動聲色勿稍露整飭防閑之迹十二月奏查下江營僻處邊疆城外官建礮臺十座內八座設於近城山上其二座在隔河山上且近苗寨請將隔河之礮臺拆毀其近城之礮俱宜安設礮位查下江營現有溢額之綠衣威遠靖蠻等礮可以撥赴派撥弁兵輪流看守每年冬月演放一二次以免鏽壞而壯邊威

上是之是月以辦理赴川官兵妥速得

旨議敘四十一年三月擢貴州提督十二月入

觀

賞戴花翎四十二年二月調湖廣提督八月疏言湖廣六協營均係水師向用鎗礮操演在於船上擺列行陣請仿照閩浙水操練習浮水之技又出師川省損失軍械內惟腰刀較多詢之官兵僉稱軍營鐵斧係每兵五名一柄不敷分用多用腰刀砍木劈柵以致殘缺請乘製造軍裝之便每名添配加鋼鐵斧一柄工料無多遇有用處以省腰刀之利器

上嘉其凡事留心四十四年丁憂回籍四十五年

諭曰廣果提督員缺緊要竇瓊尙屬妥實著卽前往署理俟服闋後再行實授四十六年二月奏稱崖州樂安地方黎匪聚集多人在德霞等村放火劫殺將巡檢黃彬射死臣聞報星馳前往相機嚴密查辦再督臣巴延三業已馳往臣一切會商妥辦上嘉之三月偕總督巴延三奏臣等抵瓊據鎮道稟報帶兵搜捕已將射死巡檢之黎匪那岸擒獲訊係官坊村頭人那回爲首緣上年秋冬州屬短雨今春糧貴那回糾約村黎搶劫實在兇匪不及百人現已生擒四十餘名鎗斃三十餘名臣等查附和者不止此數現在馳赴樂安督同鎮府逐一搜拏盡法懲治四月又奏有頭塘等村頭人將首逆那回縛送到營督兵覆行搜捕擒獲那觜等多名寘那回等於法事詳巴延三傳四十七年正月實授廣東提督四十九年十二月入

覲五十年正月預千叟宴五十一年十月因失察左翼鎮標弁兵私賣軍火得

旨交部嚴加議處尋

諭曰前據孫士毅奏拏獲外洋盜匪譚華瑞等究出外委兵丁有將火器火藥得錢租賣與盜犯行使之事已明降諭旨令從重究擬將提督竇璜交部嚴加議處矣本日竇璜具摺檢舉先將認真緝匪及此案上緊購線踰拿正賊正賊等虛文作為由伊訪出者然後累累聲敍希圖支飾其意甚屬取巧提督為專閩大員該管弁兵平日不能緝匪安良轉將火器火藥租賣與盜犯行使此與藉寇兵而齎盜糧何異竇璜既失察於前又復飾詞取巧於後難膺專閩之任何必更俟部議雲南開化鎮總兵員缺著加恩以竇璜降補仍帶革職留任八年無過方准開復十月調鶴麗鎮總兵五十二年九月疏言營中外委及弓箭馬步兵餘箭皆照額存貯而總兵將備等均不備貯餘箭竊思總兵將備為弁兵表率俱應以身先之照額補製輪換抽出演操免致桿彎翎落又施放鳥鎗若有牛皮擋牌在前一遇賊匪人在牌內而鎗遞牌外左右接連放鎗殺賊愈有膽氣報

聞五十三年署雲南提督十月調昭通鎮總兵五十六年復署提督五十七年十月仍授廣東提督五十九年四月入

覲

諭曰本日召見竇璜兩耳重聽年力衰邁廣東係屬海疆地方緊要恐致貽誤著以原品休致嘉慶元年預千叟宴六年重預鷹揚宴七年重預會武宴十一年卒

吳虎炳江蘇山陽人乾隆七年明通榜進士以謄錄議敘授廣

西馬平縣知縣十一年丁憂回籍十四年服闋

命發往湖北差委十五年補公安縣知縣十九年調漢陽縣知

縣二十年經湖廣總督開泰保舉二十一年擢浙江嘉興府知

府因嘉興府已題補曾曰理仍留浙遇缺補用二十二年授湖

南開封府知府二十四年陞湖北兵備道三十年遷江西按察

使三十一年調山西按察使三十二年復調江西按察使三十

三年調廣西按察使三十五年擢湖南布政使三十八年調湖

北布政使奏湖北借項修署尙未扣完者共有三萬七千餘兩

其中有逾限經年未報工竣尙未起扣者請嗣後凡有借項修

署已逾定限未報完工卽行按數坐扣仍將遷延職名開參下

部議行並行文各督撫等一體遵照查辦四十年擢廣西巡撫

因應行解京革職道員秦廷基畏罪在寓自盡署臬司黃邦寧移屍入監捏稱在監病故虎炳查明情節奏請將署臬司及司獄宋紱革職審擬並自請嚴議

諭曰秦廷基係問擬斬候應行解京監禁要犯黃邦寧署理臬司膽敢瞻徇同寅情面任聽安住旅館托病延挨不即起解已屬玩法及秦廷基自縊復敢捏稱在監病故移屍獄中希圖掩飾其情罪尤屬可惡黃邦寧著革職拏問該撫卽派委妥員速行押解赴京交刑部從重治罪至司獄宋紱雖係專獄之員但將秦廷基擡屍入監一節出自署臬司黃邦寧之意該司獄以微末屬員其力不能違抗予以革職已足蔽辜毋庸審訊治罪吳虎炳到任未及一月卽將秦廷基應行解部監禁之處飭屬嚴催並將黃邦寧捏報監斃移屍入獄各情弊查出據實參奏尙屬認真辦事其失察秦廷基原未收禁之處尙可從寬毋庸交部議處四十三年三月奏泗城思恩鎮安太平四府地處極邊所屬州縣解犯至省一二千里不等住宿之地不盡有城池監獄塘汛墩臺難保無虞請照雲南永昌等府之例免其解省

專責不由審轉之道員於冬季巡閱時親加研鞫

從之五月奏安南夷人陳廷瑄阮文富薙髮改裝私越隘口

上命虎炳嚴訊具奏尋奏係安南國貢使胡仕棟家人民人周

貴受賄引路周貴業已逃竄現在嚴緝

諭曰吳虎炳奏薙髮改裝私越隘口之安南夷人陳廷瑄阮文

富等一摺已批交該部議奏天至周貴以內地民人久竄夷地

本非安分之人今又復行逃竄其情罪甚屬可惡但該犯現既

在逃該撫摺內止應云獲日另結今遽以絞決問擬形之奏牘

外省辦事豈能周密該犯聞知身罹重辟藏匿愈深更難尅期

弋獲此卽該撫不解事處但既已洩漏端倪尤不宜稍涉懈緩

務須嚴飭所屬設法踰緝卽行正法其陳廷瑄阮文富二人既

訊不過貪圖獲利起見其罪可不至於死該撫所擬亦覺過重

朕初意本欲將此二人發回安南令該國王自行治罪以示天

朝寬大之恩今吳虎炳竟以奸細取供定案若復施恩遣回該

國王聞知內地訊問情由必至心生疑畏於辦理轉不便只可

俟該部覈議覆奏另行酌量降旨矣安南素稱恭順本無奸細

之可疑而天朝於該國厚示懷柔且並不興軍旅更無事之可探矣吳虎炳所訊甚屬多此一疑該撫欲因此見其辦事細心而不知適形其昧於事理也著諭令各督撫嗣後如遇有外夷交涉之事務須斟酌得宜毋稍舛誤將此傳諭吳虎炳並沿邊各督撫知之七月奏崇善縣恩城縣丞地方戶口日增原貯社穀四千石又桂林等府州所屬各州縣均有穀石分貯佐雜衙門恐佐雜等官因部中無案有虧挪霉浥等弊嚴檄佐雜等照例交代報結仍歸額貯之州縣倉庫內造冊報部並責成道府親盤以歸畫一報

聞八月奏於安南境內拏獲受賄引路之要犯周貴安南國王派夷目護送進口

諭曰周貴情罪甚屬可惡既經拿獲著於該犯解到時卽嚴訊確情從重定擬一面奏聞一面正法至摺內稱周貴竄入安南坵黎地方差役踰訪得實當卽拏獲投明該國夷目卽派差協同看守現在夷目奉到該國王諭飭令一同護送進口等語該國王聞知內地緝獲要犯卽派夷目協同看守護送進關甚屬

恭順可嘉有此一節應卽將陳廷瑄阮文富二人發回安南令該國王自行治罪四十四年四月奏崇善縣馱盧地方距縣城一百三十餘里稽查難周請將結安土州吏目裁汰改爲崇善縣馱盧巡檢遇奸匪賭博等事責成查辦下部議行是月卒

卷五十八

滿漢大臣列傳

卷五十九

曹錫寶

馬鎮國

閔鶚元

鄭國卿

姚成烈

李友棠

王際華

李全

莊存與

曹錫寶江南上海人乾隆七年由舉人考授內閣中書二十二年成進士改庶吉士三十一年散館改刑部主事三十三年遷員外郎三十五年充河南鄉試副考官擢郎中三十六年充會試同考官旋提督山西學政四十年擢山東糧道四十二年護山東巡撫國泰奏已故衛千總甯廷言之子惠因向千總張繼渠索追旗丁借項不遂用刀扎死繼渠甯惠曾向糧道曹錫寶具控因彼時各旗丁在臨清收兌飭令運千總張繼渠就近查追致釀人命

諭曰國泰奏甯惠扎死前幫千總張繼渠一招著該部核擬具奏此案甯惠因向張繼渠索取糧船零件賠數起衅彼時陞任糧道汪圻既已賠修船隻其繩索等項所費無多自應一體賠

補乃仍責令窮弁丁措辦殊屬見小至甯惠因索欠未得曾向糧道曹錫寶具控乃不卽審理仍令張繼渠就近查追以致釀成人命殊屬推諉非是汪圻曹錫寶均著交部嚴加議處又諭曰曹錫寶現交部嚴加議處之案昨春于山東行在召見看其才原不勝外任著來京以部屬用八月大學士阿桂代奏錫寶候缺需時懇自備資斧在各館修書或在部額外行走奉旨曹錫寶著在四庫全書館行走旋充滿洲源流考纂修官四十七年四庫全書成議敘得

旨曹錫寶著加恩以國子監司業陞用四十八年滿洲源流考成議敘加一級五十年正月入千叟宴三月

諭曰曹錫寶候補國子監司業得缺無期現出江南道監察御史一缺著胡翹元調補其陝西道監察御史員缺卽著曹錫寶補授五十一年六月奏協辦大學士和坤家人劉禿子房屋寬敞器具完美恐有借端撞索情事應密行偵訪嚴加懲創諭曰據御史曹錫寶奏和坤家人劉禿子本係車夫洵管家務服用奢侈器具完美苟非侵冒主財刻扣欺隱或借主人名目

招搖撞騙焉能如此當卽面詢和坤據奏劉禿子名全兒本係世僕有旗檔可查因家人衆多宅內不敷棲止是以令其在宅西興化寺街居住一向派在崇門稅務上照管一切素習尙爲安分樸實平時管束家人甚嚴向來未聞其敢在外間招搖滋事或因扈從在外日多無人管教漸有生事之處亦未可定請旨飭派嚴查重處等語和坤家人全兒久在崇文門代伊主辦理稅務例有應得之項稍有聚蓄亦屬事理之常若伊倚藉主勢實有招搖撞騙或于額稅之外擅自加增以肥私橐亦未可定著留京辦事王大臣會同綿恩都察院堂官卽傳曹錫寶令其逐條指實如果有以上情節卽一面從嚴審辦一面據實具奏不可因和坤稍有回護又

諭曰前據曹錫寶奏和坤家人全兒一摺已交留京王大臣等查辦矣曹錫寶如果見全兒倚藉主勢恐有招搖撞騙情事何妨指出實據列欵嚴參乃徒託諸空言或其意本欲參劾和坤而又不肯明言故以家人爲由隱約其詞旁敲側擊著留京王大臣詳悉訪查詢問務得實在情形朕於此案總期根究明白

並非因此一虛言欲治和坤更非欲爲和坤開脫留京王大臣等不可誤會朕旨將曹錫寶加以詞色有意吹求使原告轉成被告亦無是理務須平心靜氣虛衷詳問如曹錫寶果能指出全兒藉端撞騙欺蹟訪查得實一面從嚴審辦一面據實具奏不可因和坤稍存回護是陷和坤且自陷也將此由四百里諭令知之嗣留京辦事王大臣等將查詢情形覆奏

諭曰據奏傳詢御史曹錫寶稱我與和坤家人全兒向來從不認識卽伊在崇文門管理稅務我亦不知道伊於額稅之外有無擅自加增及別項情弊亦未有人說過我因聞全兒住屋服用甚是完美於是過興化寺街留心察看見其房屋甚是高大我想伊係家奴焉有多貲造此華屋恐有借主人名目招搖撞騙之事是以具奏等語曹錫寶旣云全兒情弊從未有人說過又未親到伊家何以又稱聞全兒住屋服用甚是完美竟聞自何人必有著落若非有人說過則曹錫寶何以知全兒住在興化寺街而經過時卽留心察看况京城內外大街小巷房屋甚多御史又無逐戶查問之理若非中有成見何以獨于全兒住

屋如此留意耶看來該御史意欲參劾和坤而又不敢明言故爲此奏隱約其詞以爲旁敲側擊之計傳旨詢問則又遁詞掩飾不覺其自相矛盾殊不知朕辦理庶務于是非虛實務須徹底究明從不肯顛預完結示人疑案著留京王大臣再行詳詢曹錫寶如果得實不妨將和坤治罪仍著王大臣等將全兒滋事不法之處究竟聞自何人據實明言毋再任其狡飾並令綿恩派步軍統領衙門司官一員帶同曹錫寶至全兒家看視住屋究有若干倘有高樓廣廈儼同府第之處卽其罪案若不過照常齊民房舍稍覺整齊亦難律以專條朕任用大臣等辦事而大臣等亦不能無驅使之僕若無似殷士俊等之招搖滋事實據真贓而第以睚眦浮言遽將中外大臣家人概行查拏治罪有是爲政之理乎仍著將查看詢問緣由由驛覆奏留京王大臣等奏遵

旨派員帶同曹錫寶至全兒家察看稱未察虛實遽行具奏實屬冒昧查該御史如果得有實據自應列欵參奏今遽以無根之言冀博建白之名應請交部議處疏入

命曹錫寶赴熱河

召對錫寶面奏全兒倚勢營私並無指實原爲和坤杜漸防微起見

諭軍機大臣梁國治等覆詢自認杜漸防微一語措詞失當咎無可道經梁國治等奏請將該御史交部嚴加議處降二級調用

諭曰吏部議處御史曹錫寶參奏和坤家人劉全兒一事並不能指出實據僅以虛詞入奏應照參奏不實降二級調用第念該御史究屬言官一時未察虛實以書生拘迂之見託爲正言陳奏姑免實降著加恩改爲革職留任五十三年八月充順天鄉試同考官九月以御史祝德麟參奏司業黃壽齡考錄不公錫寶曾將黃壽齡聲名不好向祝德麟言及未能自行參奏降二級留任五十七年卒嘉慶四年

諭曰已故御史曹錫寶曾經參奏和坤家人劉全倚勢營私家貨豐厚一事彼時和坤正當聲勢薰灼之際舉朝並無一人敢於糾劾而曹錫寶獨能抗辭執奏殊爲可嘉不愧諍臣之職今

和坤治罪後查辦劉全家產竟有二十餘萬之多是曹錫寶前此所劾信屬不虛自宜加之優獎以旌直言曹錫寶著加恩追贈副都御史並將伊子照加贈官銜給予廕生該部照例辦理二十一年禮部奏請曹錫寶入祀鄉賢祠

上以該員平日居官立品俱孚物望

允之子江蔭七品京官任大理寺評事緣事革職旋起爲中書科中書

馬鎮國甘肅固原州人由行伍於乾隆十年考補陝西提標左營經制外委旋陞右營把總十三年隨征金川赴孫克宗地方防堵進攻昔嶺冒雪衝殺受石傷節次奪礮卡數十處擢千總事平列一等議敘二十六年陞涼州鎮右營中軍守備三十一年陞都司三十四年陞甘肅提標遊擊三十六年小金川土舍僧格桑滋事陝甘總督文綬以鎮國曾經打仗出力令尅期赴川進勦三十七年正月抵資哩寨二月攻克資哩寨阿克木雅山梁奪礮卡十餘處六月調赴車布德北山梁攻克美美卡並卡旁大礮數處殺賊多名生擒一名七月攻色渠克其大寨及

周圍礮卡數十處九月因賊逃竄撤赴資官寨攻兜烏山梁及色布龍角山梁皆克之以領兵奮勇保列超等功奏入

賞戴花翎十一月攻克明郭宗山梁十二月克得兒寨燒燬賊寨十餘處生擒賊七名獲牛羊口糧軍械無算進攻美諾復克之賊首僧格桑竄布朗郭宗鎮國隨參贊大臣豐紳額帶兵進勦獲小金川頭人虎兒及土舍安堵兒進攻底木達大寨擒僧格桑之父澤旺僧格桑竄入大金川鎮國復從豐紳額帶進勦三十八年屢攻達爾圖大礮未克三十九年隨陝西提督馬彪冒雪攻奪橫亘山梁七處四十年進攻得楞一帶礮卡克之列超等功復攻斯年木咱耳鎗傷右額四十一年凱旋四十三年擢陝西宜君營參將旋授陝西潼關協副將四十六年甘肅撒拉爾逆回蘇四十三等滋事進逼蘭州陝西巡撫畢沅以鎮國久在戎行令就近調兵由西安前赴四月抵蘭州軍營檄赴河州所屬劉家峽屯紮截賊後路九月收復河州授四川重慶鎮總兵

命赴新任查辦囑嚕賊匪四十七年拏獲囑嚕匪艾隆等四十八

年劾右營千總曹福壽久病不痊借餉不繳僞捏名姓置產曹福壽亦砌詞具控四川總督李世傑奏請解任嚴審尋以福壽所控各款屬虛復任四十九年領年班番子入

觀五十年正月

命赴千叟宴

賜壽杖貂皮朝珠大緞玉如意

諭令仍帶領年班番子回任五十四年卒

閔鶚元浙江歸安人乾隆十年進士授刑部主事二十一年捐員外郎二十三年擢郎中二十四年授山東學政二十七年由學政改授山東按察使條奏懲辦竊匪事宜一偷盜倉庫錢糧之犯宜照積匪猾賊問擬一窩藏積匪之犯宜照本犯罪名問擬一失察積匪窩匪之地方官宜加處分一拏獲隣封積匪之地方官宜加議敘下部議行二十八年調安徽按察使三十一年擢湖北布政使三十二年以緬甸軍興籌備驛務奏荊門州兼轄四驛計程三百里其麗陽一驛地屬鍾祥驛屬荊門請改隸鍾祥爲便並請酌添各驛排夫得

旨允行三十五年調廣東布政使三十六年調江寧布政使四
十一年擢安徽巡撫四十二年奏鳳潁二郡節年災賑皆就安
慶池州遠途撥糧不若就近建倉貯糧以備急需而省運費請
于鳳陽郡城壽州鳳臺各貯糧三萬石壽州所屬正陽關貯糧
一萬石潁州府屬之亳州阜陽霍邱各貯糧二萬石蒙城太和
各貯糧一萬石潁上貯糧五千石共建倉四百間糧二十萬石
又奏泗州舊城自康熙十五年淮湖並泛淪沒水中州治寄居
盱眙山而所轄七十二堡皆在其北風浪阻隔官民咸以爲未
便請裁鳳府屬之虹縣歸併泗州卽以其城爲泗州治並下部
議行四十四年雲貴總督李侍堯以贓敗

上命尙書和坤鞠實論斬下大學士九卿議請從重立決復下
各省督撫議咸請如大學士九卿所擬鶚元獨奏侍堯歷任封
疆勤幹有爲中外推服請援議勤議能之典稍寬一線不予立
決

上從之事詳李侍堯傳四十五年調江蘇巡撫四十六年甘肅
布政使王曾望捏災冒賑事發

上以鶚元胞弟同知閔鶚元亦有冒賑餽送情事鶚元隱忍瞻
狗知而不舉降三品頂戴停止俸廉示懲四十七年偕總督薩
載請於金山對岸之錢家港內師古灘濬成新河百五十里直
達棲霞以避江險兼資灌溉

上允其請

賜名便民港又以京口江面遼濶請挑深江北之跨城河渡江
較近

從之四十八年正月仍復原品頂戴支領廉俸如故七月劾青
浦知縣楊卓於收漕時任聽劣監蠹書勾通舞弊請褫職嚴鞫
上嘉其實力整頓交部議敘五十年五月江南旱甚鶚元以淮
徐海所屬各得雨二三寸奏言農民猶可趕種雜糧

諭曰得雨二三寸未爲沾足焉能趕種雜糧所奏情形恐有不
實地方雨水民瘼攸關閔鶚元何得含混入告耶旋請截漕十
萬石平糶十二月又奏准徐海江揚五府屬被災較重分別展
賑常鎮二府屬分別借給籽種口糧均如所請行五十一年八

月

命偕大學士公阿桂赴浙覆訊平陽縣知縣黃梅貪汚得實以不將阿桂等原審未實之處參奏

飭之五十二年平定臺灣逆匪林爽文鶚元撥運米石添調兵丁諸務籌辦妥速

飭部議敘五十五年四月高郵州巡檢陳倚道以查獲書吏假印僞串知州吳煥沈攔不辦歷稟上司不爲批發揭報戶部

上命尙書慶桂侍郎王昶往鞫之先命總督書麟及鶚元據實覆奏鶚元陳奏多袒庇吳煥語而書麟又爲鶚元等巧詞開脫

上怒其欺罔嚴飭書麟逮鶚元等治罪五月新授江蘇巡撫福崧劾鶚元任內瞻徇署句容縣知縣王光陞詳報糧書將花戶

完納錢糧拆封侵挪一案

諭曰閱鶚元於高郵州一案始則有意消弭繼復飾詞迴護罔上行私罪無可逭乃今於句容一案又並不親提嚴審僅批江寧府查辦了事句容係江寧所屬該府自有失察處分豈肯認真查訊亦必至如高郵一案上下通同徇隱使鄉愚小民屢受蠹役劣書之擾冤抑莫伸朕又安用此大吏司牧爲耶閱鶚元

惟知養尊處優于地方官吏作奸犯科之事一切付之不理玩視民瘼狗情執法設封疆大吏皆如此居心行事國計民生尙可問乎著大學士九卿于定擬時問以重辟用示懲儆獄具以斬立決請

命改爲斬監候五十六年釋回籍嘉慶二年故

鄭國卿雲南阿迷州人乾隆十年武進士二十年揀發貴州以守備試用二十二年署貴州提標右營守備旋補陝西提標左營中軍守備二十七年陞四川太平營都司三十一年陞阜和營遊擊三十五年遷越篤營參將三十六年四月金川逆酋索諾木戕害革布什咱土司國卿將明正木坪土兵調齊於喀勒塔爾章谷兩路分守八月偕參將薛琮帶領綠營土練並巴旺布拉克底土兵從山梁往下夾攻兩路會合收復小金川所佔之納頂邊谷礮寨一百五十餘所續因攻得之約咱小礮三座賊番于昏夜爬山潛來偷奪將備等率兵迎殺國卿得受石傷旋回營調養三十七年六月傷愈復調赴軍營十月參贊大臣阿桂以甲爾壟壩爲金川要隘奏令國卿與參將楊發育管領

附近土漢官兵由格爾格堡前進是月阿桂督兵進攻水碓對面之南山梁國卿同侍衛阿坦保帶兵接應與侍衛普吉保奪取木柵三十八年將軍阿桂等奏鄭國卿自三十六年派赴軍營于攻獲章谷約咱各碉寨時打仗殺賊身帶石傷四處上年九月復派由革布什咱進攻甲魯等處亦經攻獲石碓木寨殊屬奮勉請授四川永寧協副將得

旨允行三月隨阿桂等前赴當噶爾拉山梁奪獲碓卡木柵六座十月參贊大臣明亮等奏革布什咱各要隘土漢官兵不敷分布酌抽川兵三百名令國卿分派駐守續又扎令會同藩司李本將甲魯一帶可通賊卡要隘加意巡邏四十年十二月帶領後路土漢官兵前赴噶拉依攻賊巢四十一年二月金川平留營派辦善後事宜旋丁母憂回籍四十五年服闋授湖南督標中軍副將四十九年擢福建寧鎮總兵嗣值臺灣逆匪林爽文滋事五十二年九月國卿統泉州兵三千調赴鹽水港援勦旋因大武隴餘匪在大客莊搭寮居住侍衛烏什哈達進勦時國卿遣都司吳壯圖領兵接應過河直沖賊隊賊卽沿山敗

走五十三年二月南路賊匪莊大田佔據大武隴地方爲負隅計國卿奉派駐劄白水溪一帶進逼賊匪復阻截十八重溪國卿偕烏什哈達吳壯圖等分路帶兵義民熟番等進勦追過山後殺賊數百名生擒二十餘名五十四年春總督福康安以國卿患病未痊請以原品休致

上以國卿前曾出師金川等處屢著勞績且熟習營伍

命于病痊後來京陛見酌量錄用嘉慶三年十月在籍卒子永江嘉慶戊午科武舉人

姚成烈浙江錢塘人乾隆十年進士授吏部主事十四年遷員外郎是歲丁母憂十七年服闋補原官二十二年三月遷郎中五月遷山東道御史十一月奏山西大同寧武朔平保德各府州縣例納丁糧每上丁一名完銀四五兩有逃亡故絕者以本姓頂補致累里甲戶族請

勅下撫臣查明各就該州縣人民實數均攤下部議行二十四

年五月因雨澤偶愆奏請緩行諭曰御史姚成烈奏近日雨澤愆期正清理刑獄之時請將尋

常處決案件審明定案之後牢固監禁暫緩請處決等因一摺
已照所請勅部施行矣第該御史所謂尋常處決人犯原指拉
林逃人修起琴等二案而言該犯等以行竊發遣在配逃回尙
非干犯名義隸於十惡及強盜不赦者比少緩時日正自不妨
如殺一家皆死罪人及妻妾謀死本夫強盜殺人各重犯仍當
照例決不待時爲情法之正易稱明慎用刑而不留獄若以上
各犯亦令其監候豈非留獄反干天和朕蒿目焦勞靡間寢食
然明罰勅法務在協中亦不肯以姑息爲求雨之奇術也其勅
內外問刑衙門知之閏六月掌京畿道監察御史十二月擢禮
科給事中二十七年京察一等六月巡視南城八月授江南常
鎮道二十八年調江安糧道三十年丁父憂三十三年服闋授
江南鹽驛道旋調江安糧道三十四年三月以會審潁州府知
府史魯璠與太和縣知縣郭世誼交結飭法案詞連廣德州知
州明福畏罪自經部議失于防範降一級得
旨從寬留任七月擢安徽按察使十月擢江蘇布政使調江寧
布政使三十五年九月以蕭縣知縣謝宣捕蝗不力不行查參

部議降三級調用得

旨改爲革職留任十月奏江南科場外簾五所向派官二十三員俱俟揭曉出闈應請照順天例收掌二員應俟揭曉其餘陸續竣事即行出闈下部議行三十六年四月調廣東布政使諭曰高晉奏汝不勝繁鉅之任以朕看之亦然故調汝簡處若再不勉力改過是自取罪戾矣戒之六月奏廣東駐防八旗及水師旗營各官兵俸每歲額撥各州縣米八萬六千七百餘石內有因事故停支糧米又乾隆三十三年十二月內奉文革退幼丁兵缺亦有扣除餘米自三十年至三十五年共積存二萬有奇請將此項米乘時出糶以濟民食並請嗣後積至萬石即出糶一次三十七年八月奏常平倉穀春夏平糶秋冬買補近來地方官往往因循不買請嚴定遲延處分十二月奏嵯賈行鹽異鄉子弟許就近應試設額取中至截取銓選並不迴避商籍請照寄籍例一體迴避均下部議行三十八年八月奏寄籍童生已滿二十年准其與土著一體應試又知縣銓選經九卿驗看改教職暨不勝民社督撫奏改教職俱請照二等舉人並

病痊終養起復人員例准其在本省呈明聽候派委得

旨允行並著爲例四十年五月奏粵東十郡及廣州通判均有額定倉穀因府倉無須借糶撥給州縣碾放兵米秋成補還歲需運費二千六百餘兩第碾支平糶既經改歸州縣府倉已屬空名似可并免領解之費嗣後請徑歸各州縣存貯下督撫議行四十一年以嘉應州決囚脫逃部議革職奉

旨姚成烈究係藩司刑名事非所正轄從寬免其革任四十四年五月署廣西巡撫六月因江蘇藩司任內開造碭山等縣糧冊數目舛錯部議革職

諭從寬留任奏拏獲糾匪騙錢之李萬春等得

旨嘉獎七月回廣東布政使任十一月擢廣西巡撫四十六年二月以廣東布政使任內失察茭塘盜匪案部議革任得

旨寬免閏五月檢舉遺漏聲敘歲修營房扣存稅羨請交部議處得

旨寬免十一月奏審明上林縣兵書侯玉捏造匿名揭帖盜用空白印文申送撫署許告本縣知縣陳錫齡縱子宿娼各欵擬

侯玉罪如律十二月調湖北巡撫四十八年三月奏通城縣額徵漕南二糧共五千餘石前撫臣鄭大進奏請折價解交藩庫或留縣變價行之兩年民多未便嗣後請循舊制下部議行十月因漢川縣武舉胡光璘致死胡三懷賄屬余子美妄認正兇案不能審出實情部議革任得

旨寬免十一月奏裁安陸府照磨於鄖陽府房縣所屬九道梁添設巡檢下部議行十二月奏荊門州抗糧毆官之萬世印各犯全數緝拏得

旨嘉獎四十九年七月擢禮部尙書五十年正月與千叟宴九月奏科場論題應請孝經性理遞出下部議行十一年卒

李友棠江西臨川人乾隆十年進士改庶吉士十三年五月散館授職編修六月大考四等罰俸一年十五年充陝西鄉試副考官十六年補授福建道監察御史奏言江浙士民久殷望幸鑿輅經臨地方有司理應平治道路繕具舟車先期料理敬謹將事至一切田土戶婚命盜案件或限於才力不能兼顧或藉口辦差任意推延今值

聖駕迴鑾請

勅諭督撫嚴飭辦差州縣于新舊大小事件分別先後立定期責令道府等官不時督催應審結者審結應釋放者釋放儻有玩愒廢弛之員據實糾參則牧令益加奮勉案牘可以肅清於吏治民生不無裨益奏入

上是之十七年充順天鄉試同考官十八年充貴州鄉試副考官十九年二月陞戶科給事中三月充會試同考官二十年

命巡視臺灣二十一年提督福建學政二十二年巡撫鍾音參奏友棠考試時場規不肅並違例豫印坐號分派知府代閱武生童外場不勝學政之任

勅部嚴察議奏並

諭總督楊應琚查其有無別項劣蹟應琚尋以鍾音所參各款俱實此外尙無別項劣蹟覆奏部議降三級調用

詔改爲降四級留任二十五年丁父憂回籍二十九年服闋補吏科給事中三十一年遷鴻臚寺少卿三十二年擢太僕寺少卿三十三年遷通政司副使尋擢光祿寺卿三十四年擢宗人

府府丞三十六年

命致祭西嶽華山等處及黃帝軒轅等陵三十八年閏三月充四庫全書館副總裁五月擢內閣學士兼禮部侍郎八月授工部侍郎三十九年九月提督浙江學政十月因辦理四庫全書未能悉心校勘疵謬疊出

勅部察議四十二年江西巡撫海成奏新昌舉人王錫侯妄作家貫前載友宗古詩一首

諭曰李友棠身爲卿式乃見此等悖逆之書尙敢作詩讚美實屬天良已昧著革職五十五年恭遇

八旬萬壽來京祝

嘏

賞給三品卿銜嘉慶三年二月卒

王際華浙江錢塘人乾隆十年一甲三名進士授編修十二年八月充順天鄉試同考官十三年三月充會試同考官六月大考一等三名擢侍讀學士十四年

命南書房行走十五年六月充湖北鄉試副考官時廣東設兩

學政八月以侍郎程岩提督廣韶學政際華提督肇高學政十六年岩疏言廣東學政宜併爲一廷議裁肇高一缺際華旋丁憂服闋補侍讀學士十九年遷詹事充日講起居注官二十年二月遷內閣學士六月擢工部侍郎兼管錢法堂事務七月充經筵講官二十二年五月調刑部右侍郎十月以湖南巡撫蔣炳審辦藩司楊灝侵肥尅扣一案未入情實刑部秋審時朦混照覆三法司九卿分別議處尋議革職得

旨從寬留任二十四年轉左侍郎二十五年四月調兵部侍郎六月充江西鄉試正考官二十七年疏言武闈向來挑取雙單好字號者視中額已多數倍其合式字號馬步技勇之庸弱者皆得濫邀不肖者自分無倖中之理輒串通好字號各生代倩圖利是以雙單好字號向列東號合式向列西號入場見字號在西者如難取中紛紜求出其歸號者亦無心作文終日喧譁請嗣後武鄉會試合式字號竟行裁去惟于考外場時悉心甄別將技藝實在可觀者儘數挑入好字號即將各姓名開單出示曉令內場至分別雙單之處仍照例密印于監箭冊姓名之

上封固送入內場下部議行二十八年三月調戶部右侍郎十月署吏部侍郎充武英殿總裁官三十一年正月兼署工部侍郎六月教習庶吉士三十二年六月疏請修庶常館得旨允行七年轉左侍郎三十三年充江南鄉試正考官三十四

年十月疏言武英殿繕錄向用國子監貢生十員充補近年來國子監祇憑文考取咨送多有書法不工者查吏部原有考取膽錄以備各館咨取請將送補貢生例停止行文吏部咨送膽錄內正途出身者充補六年限滿議敘至現在繕寫之事無多請于原額十缺內裁減四缺每月公費卽由殿給發以省支領之煩下部議行十一月內擢禮部尙書三十五年九月

命偕刑部尙書協辦大學士官保戶部侍郎英廉總理平糶事尋以北城麩麪短少曾經報出不卽查辦

命交部察議部議俱降一級留任詳見官保傳三十六年御史趙瑛奏鄉試移取書籍及舊文應行禁止際華等議舊文無庸禁其移取查直省鄉闈惟順天有

欽頒書籍而江南等省尙沿用坊間舊本不但魚魯易訛亦多

殘缺請通行頒發

從之三十八年三月充四庫全書總裁官四月晉太子少傅五月

命辦理四庫全書薈要八月調戶部尙書二十九年三月京察加一級十一月

賜紫禁城騎馬四十一年三月卒

諭曰王際華才品端謹學問優長久直內廷簡任部務懋著勤勞邇年承辦四庫全書及薈要事宜頗爲殫心經理且年甫六旬正資倚畀今聞其痰湧暴厥醫治無及遽爾溘逝深爲悼惜著加恩晉贈太子太保並派散秩大臣一員侍衛十員前往奠醢其各任內革職留任之案俱准開復應得卹典仍著該部察例具奏尋

賜祭葬諡文莊四十三年

恩賜其子朝梧爲內閣中書官至山東兗沂曹道

李全山西陽曲人由行伍拔補撫標右營把總乾隆十年遷文水縣城守營千總十六年俸滿引

見

命在巡捕營効力二十年擢巡捕中營守備二十三年遷南營遊擊二十四年遷南營參將二十六年三月軍政列一等五月諭曰李全前于兵部開列時卽欲陞用副將因其熟諳地方營務是以未經放補著加恩賞給副將職銜仍管理南營參將事務三十二年三月擢雲南永順鎮總兵九月從將軍公明瑞勦緬甸由宛頂木邦進十一月至蠻結賊立山寨列象陣明瑞令全同領隊大臣扎拉豐阿據東山梁張犄角擊賊大敗之十二月師至天生橋乘霧渡河全率左哨兵直薄賊壘賊驚潰二十三年正月轉戰至蠻化賊蜂至冲突大隊全戰益力受鎗傷越數日卒事

聞

命優恤入祀昭忠祠並從祀旌勇祠給騎都尉加一雲騎尉世職

賜祭葬子萬年襲官至廣西右江鎮總兵

莊存與江蘇武進人乾隆十年一甲二名進士授編脩十三年

五月散館考列二等

諭曰歷科進士殿試一甲第一名卽授爲修撰二名三名卽授爲編修至散館時向無所更易伊等恃已授職遂甘自怠忽學業轉荒卽如今年散館修撰錢維城考列清書三等編修莊存與考列漢書二等之末其不留心學問已可概見但錢維城係派習清書或尙非其所素習著再試以漢書候朕酌定莊存與不准授爲編修俟引見時朕酌量其人才或以部屬或以知縣或歸班選用則此後一甲之人皆有所警而專心學問若有仍考列三等者其列視此十六年五月引

見仍授編修是年恭逢

孝聖憲皇后六旬聖壽慶典特開鄉會恩科

命於次年春舉行鄉試十二月充湖北鄉試副考官十七年六月大考二等陞侍講尋直南書房十八年六月擢翰林院侍讀學士充湖北鄉試正考官九月提督湖南學政二十年四月遷少詹事六月擢內閣學士兼禮部侍郎二十一年充浙江鄉試正考官九月提督直隸學政二十二年奏直隸冒籍生員自首

改首每多至五六十名少者十五六名尙有未經查出者恐此後有將本身入學姓名令兄弟子姪頂替甚或賣與各省童生頂名呈首或本自首於北而他人頂替于南若但據自首改回弊恐不少請將冒籍各生暫停南北歲科兩試定限一年著落本身自首卽據所首姓名三代籍貫一面咨禮部存案一面行該省取具父師親族鄰里切實甘結地方官加具印結方准咨回該省學政入冊如查有假冒頂替照例辦理首明雖限一年咨查需日己卯鄉試應停收考錄送下部議行二十三年二月存與考試滿洲蒙古童生因不能傳遞各童生擁擠鬧堂經御史湯世昌參奏

命革存與職尋

諭曰莊存與于考試童生鬧場一案既不能參奏于前及朕面召詢問又不據實陳奏是以將伊革職但各童生喧鬧究因該學政辦理不能傳遞之故今既審明情節而該學政竟因此罷黜殊非懲創惡習之意莊存與着帶革職仍留內閣學士之任尋奏請酌減各直省鄉試官卷中額

諭曰前據莊存與條奏各直省鄉試官卷應酌減中額一摺隨經蔣溥請將官卷裁去一併歸入民卷均交大學士九卿議奏矣朕昨敬閱

聖祖仁皇帝實錄內載

上諭令大臣子弟另編字號考試取中既以肅清弊端又不致有妨孤寒進取恭覽之下仰見

皇祖慎重科名嘉惠士子立法之始本爲防弊而彼時諸臣奉行者不無徧袒子姪親族之見含糊具奏分定中額未免過多遂使以憐卹寒峻之意轉成優倖縉紳之路揆之情理實未允協此議減議裁者所由來也朕思中額貴有限制而立法務在均平嗣後各直省鄉試官卷于現在定額中斟酌公當大省每二十名取中一名中省每十五名取中一名邊省官卷本屬無多不妨稍寬其額每十名取中一名如此辦理則官卷既免濫取之弊亦不致有妨孤寒不必去官卷之名而于制科取士兼收並採之道庶爲平允其如何酌量妥辦無致偏枯並著大學士九卿詳議具奏旋議定直隸江南浙江江西湖廣福建等大

省官生二十名取中一名三十一名取中二名山東河南山西
廣東等中省十五名取中一名二十三名取中二名廣西雲南
貴州等小省十名取中一名十六名取中二名順天鄉試滿洲
蒙古漢軍照小省取中南北貢監照中省取中不及額者歸名
卷

從之又奏磨勘舊例內筆誤二三字停會一科與字句偶疵不
妨寬貸一條前後互異請嗣後字句疵謬罰停會試一科筆誤
無關弊竇者免議又奏場內經題向例同考官先擬考官書籤
掣用嗣後令考官自擬以杜同考官代士子預擬經題之弊均
如所議行四月擢禮部右侍郎二十四年四月奏各省優生赴
京朝考請照考試續到拔貢不拘人數之例一體辦理

從之閏六月丁父憂二十七年正月服闋補內閣學士三十二
年

命在尙書房行走三十六年三月充會試副考官六月充浙江
鄉試正考官三十七年

命教習庶吉士三十八年仍補禮部侍郎三十九年提督山東

學政尋調河南學政四十一年丁母憂四十三年服闋四十四年六月署禮部侍郎十月補禮部右侍郎四十九年二月轉禮部左侍郎五十年八月命偕禮部尚書德保重輯律呂正義五十一年正月上以存與年力就衰予原品休致五十三年十月卒

卷五十九

滿漢大臣列傳

卷六十

紀昀

朱椿

史奕昂

朱珪

紀昀直隸獻縣人乾隆十二年第一名舉人十九年進士改庶吉士二十二年散館授編修洊擢至詹事府左春坊左庶子充日講起居注官昀官編修于二十六年京察一等以道府記名三十三年二月補貴州都勻府知府

上以昀學問優外任不能盡所長

命加對品銜留庶子任四月擢翰林院侍讀學士六月前兩淮鹽運使盧見曾獲罪有

旨籍其家昀與盧爲姻漏言于見曾孫蔭恩革職逮問戍烏魯木齊三十五年釋還三十六年

上幸熱河十月昀迎

鑾密雲

御試土爾扈特全部歸順詩立成五言三十六韻以進得旨優獎復授編修三十八年二月

命儒臣校覈明代永樂大典

詔求天下遺書開四庫全書館選翰林官專司纂輯大學士劉統勳以昫名薦充纂修官後又奏全書浩博應斟酌綜核以免掛漏參差舉昫及提調官郎中陸錫熊爲總辦搜輯大典中逸篇墜簡及海內祕笈萬餘部釐其應刊應鈔應存者依經史子集部分類聚撮其大凡列成總目爲提要二百卷上之

諭曰四庫全書處將大典內檢出各書陸續進呈朕詳加披覽閒予題評見其攷訂分排具有條理而撰述提要粲然可觀則成於紀昫陸錫熊之手昫學問本優校書亦極勤勉甚屬可嘉著加恩授爲翰林院侍讀以示獎勵十一月補侍讀三十九年七月

上以總目提要卷帙繁

命昫輯簡明書目一篇初

上求遺書凡中外所獻皆擇其珍本製詩弁于首昫進書部凡百

御題所進孫覺春秋經解有邵張珍壽今歸紀汲古深心有足

多之句十月以子女佶通負罪誤議降調

詔改降三級留任故事降留官遇升缺不予開列四十年吏部

請除翰林院侍讀學士無昫名

上以昫於四庫全書盡心裒輯

命一體列名四十一年正月擢侍讀學士充文淵閣事九月復

充日講起居注官四十二年館臣校書錯誤應議昫以

特旨免四十四年三月擢詹事府詹事四月擢內閣學士兼禮

部侍郎四十六年提要成進

御

上嘉其詳覈

命優敘四十七年擢兵部右侍郎四十八年轉左侍郎四十九

年

上南巡

行在發

御製濟水考寄昫

命據各說經家及輿地家詳考之五十年正月擢都察院左都

御史四月員外郎海昇毆斃妻吳雅氏詭言自縊死事覺

命昫鞠其獄覆檢不實部臣議鑄職

詔改革職留任五十二年遷禮部尙書充經筵講官五十四年
賜紫禁城騎馬五十六年再調左都御史五十七年畿輔歲歉
饑民多就食京師昫奏言直隸河間等府二麥歉收

命截漕五十萬石備賑而領賑百姓有極貧次貧之不同次貧
之戶可以支持待賑不肯輕去其鄉至極貧之戶一聞米貴不
能不就食他方近京之處多先赴京城傭工餬口恐聚集日多
未必能人人得所又業已扶老挈幼拮据得至勢難以卽返就
糧是此項流戶以極貧之故離其鄉非轉不能同沐

皇仁似爲可憫定例每年自十月初一日起至次年三月二十
日止五城原設飯廠十處每日領官米十石由坊官煮放外來
流戶原可同霑但自夏至冬爲期尙遠恐貧民迫不及待且人
數較多米數亦未必能敷伏思偏災不過四府賑米有餘請於
原額五十萬石內酌撥京城數千石自六月中旬爲始每廠煮
米三石至十月初一日後則于原額一石之外加煮米二石仍

均以三月二十日爲止其米先于京倉支用將來於截漕數內撥還庶貧民就食者得以在京存留不致間關遠去明春易于還鄉不悞耕作卽各處聞有此信來者較多伊等本係應賑之人此間多一人領飯則本地少一人領米計人數米數仍屬相當亦不慮本處給散之不足如此一轉移間所需賑米仍在截漕原額之內而貧民在鄉在外皆得均霑于賑務更爲周到疏聞下廷臣議從之八月復遷禮部尙書仍署左都御史十二月奏考試春秋向用胡傳而胡傳一書中有經無傳出題之處不過數十卽如本年鄉試竟有一題而五省同出者其三、四省相同不一而足士子不讀全經不知本事但記數十破題便敷衍試之用且胡安國當宋南渡時不附和議作是書以諷高宗而斥秦檜其人品剛正而借經立說與孔子之意不相比附恭讀聖祖仁皇帝欽定春秋傳說彙纂駁胡傳者數十百條

皇上御製文亦多駁其說而科場所用以重複相同之題習偏失謬當之論殊覺無謂請嗣後春秋題俱以左傳本事爲文參用公羊穀梁之說在三傳親承聖教既較三千年後儒家之論

爲得其眞而士子不讀左傳不能成文亦足以勸經學而裨文風疏入得

旨允行六十年與千叟宴嘉慶元年六月調兵部尙書十一月復調左都御史二年復遷禮部尙書四年充

高宗純皇帝

實錄館副總裁七年昀年八十生日

命署上駟院卿常貴賚珍幣至昀家賜之六月署兵部尙書七月上

孝淑皇后奉安事宜陳奏失當部臣議鑄職

詔改革職留任又以咨送議處司員祇宋其沅一人爲御史鄭敏行所劾部臣如前議

詔改降三級留任其後

孝淑皇后奉安禮成

命再予量減有差十月奏定例凡婦女強姦不從而被殺者皆准旌表其猝遭強暴細縛受污不屈見戕者則例無旌表伏思此等婦女舍生取義其志本同徒以或孱弱而遭獷悍或孤

身而遇多人此其勢之不敵非其節之不固卒能悍及捐生與抗節被殺者無異譬如忠臣烈士誓不從賊而紮縛把持強使跪拜可謂屈膝賊庭哉請

勅交大學士九卿科道公議與未被污者略示區別量予旌表尋議如兇犯在兩人以上者顯係孱弱難支與強姦被殺者一例予旌令各督撫勘明奏請

上裁

報可是月昀有疾

命軍機章京富綿率醫官王詔恩視之十年六月以禮部尙書協辦大學士加太子少保管國子監事二月卒

諭曰紀昀學問淹通辦理四庫全書始終其事十有餘年甚爲出力由翰林洊歷正卿服官五十餘載甫經攘褻綸閣遽聞溘逝深爲軫惜著加恩賞陀羅經被派散秩大臣德通帶侍衛十員前往祭奠並賞廣儲司庫銀五百兩經理喪事其任內降革處分悉予開復應得卹典該衙門察例具奏尋議

賜祭葬如例

予諡文達昫官庶吉士時應

制圓明園及扈

蹕熱河行圍皆與賡和

天章泊纂輯四庫全書

賞賚內廷翰林又以侍讀

特召入重華宮賦詩與宴後乃歲以爲常其兼文淵閣直閣事

自侍讀學士至尙書皆如故所纂輯如熱河志歷代職官表河

源紀略八旗通志暨方略會典三通諸館咸總其事子汝傳江

西九江府通判嘉慶十二年

高宗純皇帝

實錄告成敍昫功

恩賞汝傳同知後補江南江寧府同知汝似分發廣東縣丞孫

樹馨一品廕生官刑部雲南司郎中現任宜昌府知府

朱椿江蘇婁縣人由監生捐納通判効力江南松江太倉二屬

海塘工竣議敍授湖北荊州府同知乾隆十二年遷浙江金華

府知府十六年擢溫處道旋丁母憂服闋授福建興泉永道二

十七年因在溫處道任內卓異屬員陞轉他省別犯賍欸降二級調用旋准捐復二十八年補湖北鹽法道三十五年擢廣西按察使四十年授雲南布政使四十一年六月奏滇省投誠土夷滋生日繁國家經費有常勢需增給口糧請飭令於安插地方或佃種傭田或小本貿易更有年力盛壯者酌挑入伍上嘉其議七月奏委運京銅人員請由道府公舉移司覈詳督撫濫舉者一併查參

從之十一月調廣東布政使四十三年奏南寧太平鎮安泗城等府向募客民充當書役或有藉端滋事遠颺異地現飭屬另募土著充當其隻身流寓者概勒限退役回籍下部議行四十四年十月奏思恩府屬有上林縣一缺又有土上林縣一缺自唐宋以來並設兩知縣印文相同不足以核實昭信請改鑄土上林縣印十二月奏修理衙署所借官項例于本任俸內分年扣還粵西苗疆烟瘴佐雜官調回內地與推陞者均有一定年限該員知離任日近任內扣項無多率請借修署應請分別定限三年調回者限定任一年內請修三年候陞者限二年五年

者限三年並請雲貴川廣閩省之苗疆烟瘴等缺均照此例四十五年六月奏請士民告官之案照例限四個月完結如逾限不結照命盜雜案例接扣查參如再不結卽照易結不結例革職九月奏永福等七縣每年額收變價官租遇補還常平倉穀時轉赴市採買徒多運費請嗣後除無需採買年分照舊變價解司如需採買之年卽將官租劃抵均如所請行四十六年正月雲貴總督福康安等奏請清釐滇省積欠鹽課將舊欠無著銀三十二萬餘兩在通省養廉內攤扣歸欸

上以此皆係歷任之督撫藩司等經理不善所致朱椿曾任雲南藩司錢糧是其專責此項積欠銀兩自應着落分認賠補十月奏向例州縣缺出正印之員准于州同州判府經縣丞內暫行委署但必已補實缺方可委用若初到試用佐貳人員卽署正印實屬過優請嗣後祇准將已經補缺之佐貳遴委其試用初到人員概不准委

從之十二月擢廣西巡撫四十七年六月奏盤獲廣東崖州回民海富潤鈔錄回字經卷及漢字天方至聖實錄年譜等書現

在逐一嚴詢從重究辦

諭曰所辦殊屬過當就現在簽出字句大約鄙俚者多不得竟指爲狂悖若必繩以國法將不勝其擾著毋庸辦理嗣後各省督撫遇有似此鄙俚書籍俱不必查辦又奏宣化柳城武緣天保奉議五州縣開墾老荒水旱田八十八畝有奇又墾田五十四漳報

聞七月

諭曰朱椿查辦回民海富潤攜帶經卷等書一案不俟接奉諭旨卽分咨各省一體查辦著傳旨嚴行申飭伊此事辦理錯謬本應降調因其初任不諳非有意邀譽沽名者比是以免其議處嗣後務當斟酌事理輕重留心妥辦旋湖北巡撫姚成烈奏稱接據朱椿來咨當將海富潤案內牽涉之袁二孛訊因奉

旨毋庸辦理隨當堂省釋

諭曰袁二本係安分回民年逾七旬無辜受累可見各省因此滋擾者不少皆朱椿辦理錯謬所致著交部察議九月劾部選廣西南寧府同知程德炯藉病遷延規避遠缺得

旨程德炯係部選人員理合依限赴任乃託詞患病至九月有餘顯係有心規避程德炯革職發往軍臺効力贖罪至朱椿前于回民海富潤一案辦理錯謬因降旨察議經部議以降二級調用不准抵銷實所應得今於程德炯規避遠缺卽據實參奏尙屬留心所有部議降調著加恩改爲革職留任又奏民間烏鎗例應查禁惟廣西各屬猺獞人等類多山居時有虎狼出沒必需烏鎗防禦請毋庸收繳

從之尋因前署湖北漢黃道任內失察吳碧峯刊刷瞿罕所著體孝錄孝經對問語多悖逆並不實力稽查部議降二級調用得

旨寬免四十八年三月授兵部右侍郎五月遷左都御史七月奏思恩府新設督捕通判係桂林府糧道裁改請嗣後思恩府督捕通判缺出應照桂林府糧捕通判例歸部銓選得旨允行四十九年二月卒

史奕昂江蘇溧陽人父貽直官大學士自有傳奕昂以父蔭補刑部山西司員外郎遷郎中乾隆十三年授山東兗沂曹道十

四年調運河道六年東平州運河決口

勅詢嚴議復

諭曰史奕昂現交部議其處分止于革職史奕昂乃大學士史貽直之子卽令革職亦不至困阨徒使優游坐廢無自新之路且道缺更易生手于一切挑濬築壩備料諸務恐未能及時辦集于運道甚有關係史奕昂平日尙屬黽勉可望仍就著從寬革職留任令其勉圖後效如不知奮勉稍有疎虞卽從重治罪十九年

上命前任甘肅巡撫鄂昌前赴陝甘辦理準噶爾軍需以奕昂署甘肅布政使二十年三月奏言從前軍需報銷每遲至數年承辦之員類多更易查詢愈煩胥吏反得上下其手此次擬俟大兵齊至軍營卽查明隨時題銷其有用剩銀兩或應留備道庫府庫或應提解繳司現在先爲清理如有必須凱旋後覈造者請以凱旋日起限一年造報

上嘉之尋鄂昌與逆犯胡中藻唱和案發詞連史貽直札託鄂昌爲奕昂請署甘藩事罷貽直官

命奕昂來京以京員用五月授福建按察使六月陝甘總督劉
統勳奏稱川省解甘軍需銀兩查驗委有青潮照色折算共短
銀二千兩有奇部議前署藩司狗隱不報例應革職

上特予寬免二十一年疏稱武職疎防例由提鎮開報督撫查
參福建係有總督省分遇有應參職名向祇由臬司移營查取
轉詳督撫辦理與各省殊未畫一請嗣後閩省武職員弁凡遇
疎防失察應行查參等案均令該提鎮等揭送總督分別議處
又稱外省秋錄所擬情實係督撫同司道于會審時密定並不
先行明示倘於定案時部文先聲明情實外省抄案轉行人人
共曉秋決期遠致有自戕兔脫等事請于行文時將應擬情實
一節另行密咨均下部議行二十三年奏新頒定例凡州縣相
驗初供及正犯到案日期俱應咨部存案立法周詳猶有逾越
分限之處緣州縣相驗通報後每觀望上司意指俟督撫批轉
始行覆審其間延擱證佐候審廢時失業而刁黠犯屬往往尋
覓訟師打點房差避重就輕令審官多方究詰迨輸服成招限
已屆滿臣詳明督撫通行各府州縣凡人命相驗後如案犯已

齊一面具文通詳一面即由府解司不必候批始行提縣至相
驗後或案犯未齊於首犯已到即以首犯到案起限速行審結
未獲犯聲明獲日另結若從犯先到供吐確實亦即先結從罪
一面勒限嚴緝正犯究結倘承審官延挨不辦立即查照違限
月日揭報參處二十四年奏漳泉二府建有府監其收禁不過
解府審轉之犯空房頗多龍溪平和漳浦晉江同安五縣監犯
多至百餘名及數十名不等請將各該縣收禁臺屬重囚提撥
該府監收禁責成司獄防範又奏各省督撫藩臬三年例准入
覲同知州判州縣亦定於十年引見惟道府未定有年限應酌
以六年爲期俱

從之二十五年擢廣東布政使二十七年奏向例官員具結請
封于祖母下聲註係室女並無再醮等再醮二字爲巾幗所羞
稱人子所不忍道請節去此二字得

旨嘉獎二十八年丁父憂三十年服闋赴京候補十一月署兵
部侍郎三十一年正月授兵部侍郎四十一年

上幸闕里奕昂詣

行在迎

變

賞二品職銜五十年

上以國慶舉千叟宴禮奕昂與焉五十六年卒

朱珪順天大興人乾隆十三年進士改庶吉士十六年散館授編修十七年大考二等擢侍講二十二年充日講起居注官二十三年大考二等擢侍讀學士二十四年三月京察一等記名八月充河南鄉試副考官十月以定回部奉

命告祭南嶽衡山二十五年三月充會試同考官七月授福建糧驛道二十八年十月陞福建按察使二十九年九月丁父憂三十二年二月服闋補湖北按察使時大兵征緬甸奏言滇省軍報由楚省南境經襄陽縣之漢江呂堰等驛出楚省北境臣逐站選驗夫馬度量遠近分設腰站十六處並查勘南北大江及小溪渡河共九道分設船隻於渡口晝夜輪候並飭各站驗較時刻明立賞罰俾案件隨到隨遞得

旨嘉獎三十三年三月調山西按察使三十四年二月陞山西

布政使七月奏保護城工事宜略言晉省土性不一宜修築者爲粘土黃土立土不宜修築者爲鹺土沙土黑土又取土有遠近或近水有嫌遠水無嫌承辦不力不得辭其罪查原辦官保固三十年立法至爲詳盡而各員多已易任接任之員以爲責有攸歸漫不經意漸致隕朽請嗣後責令現任各員勤加葺護按季報明上司如有因循玩愒將原辦官及現任地方官一體參處分賠奏入下部議行三十六年十月命護理山西巡撫旋以入

覲時

上詢巡撫鄂寶居官如何奏對失實虛詞延譽傳

旨申飭十二月奏平陽府屬之霍州路當孔道政務衝繁請改爲直隸州以趙城靈石兩縣隸之吉州一缺所屬鄉寧一縣僻處山陬民淳事少請將吉州改爲散州與鄉寧縣並隸平陽府管轄又奏籌土默特當差官兵盤費並新開牧地米石請改徵折色以便民除弊均得旨下部准行四十年五月

命來京陛見尋授翰林院侍講學士充明紀綱目纂修官復充日講起居注官四十一年五月

命在尙書房行走侍

今上皇帝時初置文淵閣直閣事以珪充之四十三年三月充會試同考官四十四年二月充四庫全書館總閱五月

命爲福建鄉試正考官四十五年京察一等記名八月授福建學政進五箴于

今上皇帝其目曰養心曰敬身曰勤業曰虛己曰致誠四十七年九月陞詹事府少詹事四十八年

命稽察右翼覺羅學四十九年扈從

南巡授內閣學士兼禮部侍郎

命閱召試卷四月充殿試讀卷官十月充武會試總裁五十一年三月陞禮部右侍郎六月充江南鄉試正考官八月授浙江學政五十二年五月轉禮部左侍郎五十三年八月調吏部右侍郎五十四年十月

命充經筵講官五十五年三月充會試副總裁七月授安徽巡

撫五十七年二月以安徽民人程菊刀傷胞兄程紹章身死案律應擬斬立決聲請從輕

諭曰此等不過刑書開脫故套最爲外省陋習各督撫皆所不免但朱珪本係書生尤好爲此迂濶多活人積陰德之見遇事從寬所謂婦人之仁實屬非是朱珪著交部議處七月奏言修臨淮鄉土壩埂添建五孔石橋一座宣洩水勢奉

旨派山西巡撫長麟由驛前赴鳳陽會同朱珪確加履勘尋查出橋工經知縣墊銀修竣前任巡撫何裕城批飭不准橋壩同時修辦故未經據實申報珪誤認尙未興工冒昧具奏自請交部治罪部議降一級調用得

旨從寬留任五十八年十二月

諭曰昨安徽巡撫朱珪進御製說經文閱其後跋以朕說經之文刊千古相承之誤宣羣經未傳之蘊斷千秋未定之案開諸儒未解之惑頌皆過當但歷舉朕敬

天法

祖勤政愛民各大端見諸設施者與平日闡發經義實有符合

語皆紀實並非泛爲諛詞朱珪於御製古文紬繹推闡能見其大跋語尤得體要殊屬可嘉著賞給筆墨等件以示獎勵五十五年四月

諭曰朱珪進御製論史古文後跋以朕論古之文紬繹推闡有因史成經紹六爲七之語朱珪跋語固非鋪張揚厲泛爲諛詞究屬稱頌過當第觀其文義尙爲典覈著賞給紗扇筆墨等件以示獎勵此冊並著皇子皇孫各繕一部預備觀覽五月補廣東巡撫七月

諭曰朱珪進御製紀實詩十二函內編排門類列敘案語具見用心審密所撰進書表文摛詞比事亦屬典覈惟過於頌揚於朕兢業自持惟日孜孜之意尙覺歉然第觀其屬辭命義尙爲雅馴茲賞去御筆扇一柄紗疋筆墨等件以獎其勵學十二月諭曰朱珪進呈御製幾餘篇一部朕略加批覽係繕錄御製詩章分門別類編輯成帙可謂用心細而措詞當該撫應辦地方要務甚多若專用心于筆墨之事恐致政務轉不免疎漏豈朕簡畀封圻之意除頒賞荷包筆墨鏤錠外着傳諭朱珪謂須盡

心政務以察吏安民爲重不可緩其所重用心于無用之地嗣後亦無庸再行纂辦進呈惟當悉心民事以期無負委任六十年二月

上釋奠文廟禮成

臨幸辟雍

御製詩四章

特命珪恭和進呈又以辦理盜案認真得

旨交部議敘尋

命兼署兩廣總督四月授都察院左都御史暫留巡撫任八月陞兵部尙書仍留巡撫之任十二月奏英咭喇入貢使臣有送總督禮物一分告以天朝大臣例不與外夷交接得

旨嘉獎嘉慶元年恭值

授受禮成珪撰進詩冊

諭曰朕閱朱珪所進詩冊措詞冠冕得當其頌揚處不忘箴規

尙得大臣之體且二十五有韻內難押者居多今百韻成篇不致牽強是其學問素優著賞給顧繡蟒袍大小荷包以示優眷

二月

諭曰朱珪奏拏獲洋盜審明定擬二摺既引立斬梟示之例而於文昌縣拏獲之犯將陳阿養一犯先行正法其餘四犯及另案三犯皆擬斬決聽候部議以致往返稽遲朱珪近日督緝洋匪屢獲多犯朕方喜得人曾加獎勵何以此二案辦理拘泥又不脫書生習氣著傳旨申飭六月擢兩廣總督兼署廣東巡撫尋奉

旨朱珪著來京另候簡用七月

諭曰昨據和琳奏孫士毅在四川酉陽州病逝將來大學士缺意欲卽以朱珪補授但此缺須一月後方始題請特先降旨諭知朱珪補授因有來京之旨心存疑慮現在京中並無應辦之事朱珪不必急于來京兩廣總督仍著朱珪署理至朱珪在廣東巡撫任內辦理一切本爲熟悉今復奉有恩旨尤應感激奮勉倍加認真不可存五日京兆之心有負委任一切洋盜更應嚴辦大學士員缺除俟屆期明降諭旨外將此先行傳諭知之

八月

諭曰前因大學士缺出朱珪科分較深學問素優人亦端謹是以降旨令其來京原欲將伊補授大學士乃節據魁倫奏到粵東艇匪駛至閩浙洋面肆劫是朱珪於署總督任內不能認真緝捕咎實難辭本當治以應得之罪姑念其操守尙好前任安徽巡撫辦理尙無貽誤茲特加恩仍令補安徽巡撫十一月

諭曰吉慶奏緝捕洋匪設立章程俱合機宜朱珪等從未見似此之奏鈔寄閱看並將在粵時何不照此章程之處明白回奏嗣奏臣兼署總督審辦洋盜粵閩夷匪同案同船者不少俱奏明正法前督臣長麟製米艇九十三隻分作東西中三路配足兵械于冬令委員駕巡臣以米艇纜索桅篷日久不能堅固趕修驗明連幫出洋此臣辦理之大略也又臣于本年五月因調修出洋米艇曾捐銀五千兩茲請再捐養廉一萬五千兩解交廣東藩庫爲隨時修理之用報

聞二年三月陞兵部尙書八月調吏部尙書均仍留安徽巡撫

任三年

諭曰本年京察屆期朱珪以尙書署理巡撫有年且學問尙優

著交部議敘四年正月奉

諭朱珪著來京供職珪行抵王莊卽先馳奏曰竊臣于正月十

一日接奉

諭旨召臣還京見封面標用藍筆手掉心搖不知所措因未奉
有明文不敢冒昧謹將交印起程日期馳奏忍泣銜哀見星奔
路十七日行抵王莊臣齋摺差官回跪閱

批旨詢實

太上皇帝龍馭上昇裂膽呼天角崩投地欽惟

大行太上皇帝十全功德五福考終傳器愜心於昭在上我

皇上純性超倫報天罔極竊聞公定行三年之喪此舉邁千古
而行萬世至于

郊壇

宗

社越紼行事禮有明文並行不悖也然而
天子之孝不專以毀形滅性爲奇而以繼

志述

事爲大

親政伊始遠聽近瞻默運乾綱霽施渙號陽剛之氣如日重光
惻怛之仁無幽不浹刻刻以
上天之心爲心

祖

考之志爲志思修身嚴誠欺之介於觀人辨義利之防君心正
而四維張朝廷清而九牧肅身先節儉崇獎清廉萬物昭蘇天
佑民順自然盜賊不足平而財用不足阜也臣早蒙

先帝特達之知擢遷中外舊侍

皇上承華之側親戚光輪十載睽離五中鬱勃聲隨淚湧忱豈
言宣惟願我

皇上恒久不忘堯舜自任之心臣敢不隨時勉行仁義事君之
道既至

召見於永思殿

命直南書房管理戶部三庫事務

賜

大行皇帝遺服四團龍補褂一件四開襖袍一件奉
旨 在紫禁城騎馬

賜第一區于西華門外加太子少保銜充

實錄管正總裁兼國史館副總裁三月

命充經筵講官會試正總裁官五月

命教習庶吉士八月

命管理武英殿御書處事務以編修洪亮吉投遞書札語涉狂
悖未卽呈出奉

旨 詢查自請嚴議得

旨 朱珪平日人品端正從寬交都察院察議議上降三級調用
奉

旨 從寬留任十月調戶部尙書

賜元狐端罩七年充殿試讀卷官八月奉

旨 以戶部尙書協辦大學士仍加太子少保銜八年二月

上謁

陵

命留京辦事六月兼翰林院掌院學士並以原銜充日講起居
注官七月

上幸避暑山莊復

命留京辦事九年正月晉太子少傅二月

上幸翰林院聯句

賜宴

御書天祿儲才額

賜珪並摹刻懸院中七月暫攝管理國子監事務十月

命進所刊知足齋詩集二十卷十年正月補授體仁閣大學士

管理工部事務

上以是命也實遵

高宗純皇帝之

諭

命叩謁

裕陵謝

恩並

賜題知足齋集四首詩曰丙歲承

恩手勅傳待時

考澤敬敷宣科名翰苑推元老學業綸扉倚大賢定卜

示慈十載久執經蒙誨卅年先調羹贊化資師相一德臨民體

昊乾三天受業邁恒榮廊廟班聯冠六卿黃閣新春開輔座絳

帷昔日共書城德崇益勉虛能受任重彌思寵若驚名選金甌

早

簡在亮工熙績總無營新築沙堤董庶官七旬碩彥願加餐惟

公常勗爲君要顧我深知莅政難無欲神全三壽永有容德大

九霄寬蒼生竚待施霖雨啟沃推誠求治安健筆千章涅不緇

雄詞風荷

聖人知日宣三德新宣室時講五箴舊講帷學杜師韓言有物

說經詠史論無私精研六義諧風雅游夏誠難贊一辭旋充國

史館會典館正總裁三月充會試正總裁旋奉命帶管二阿哥

師傅不應具摺謝

恩退出尙書房十一年七月

上幸避暑山莊奉

旨留京辦事九月

賜玉鳴杖並頒

御製詩云惜昔丙申年三天從函丈經學溯淵源傳史示直枉
身心受益多識見資開廣舊承講論功今賴絲綸掌鶴髮望飄
蕭丰神倍清爽始進下壽旬康強久培養健步固未妨視履應
策杖入朝領班聯佳話羣欣仰廊廟多老臣啟沃善日長碩彥
冠瀛洲純嘏期頤享旋奉

旨以天氣漸寒朱珪俟日出後入直遇臨幸離宮不必隨來卽
御門勾到奏事日期俱不必侍班間二三日入直書房候召對
十一月

上在乾清宮將御座珪忽病眩暈不省人事

御前大臣恐其失儀命太監等卽用木橙自月華門昇出

上遣醫官診視旋經領侍衛內大臣參奏交部嚴議部議革職

奉

恩旨念其衰病趨直一時昏迷從寬留任並賞假兩月調養十

二月初五日卒奉

上諭大學士朱珪持躬正直砥節清廉經術淹通器宇醇厚

皇考高宗純皇帝特達之知由詞垣補授道員洊歷兩司內用
爲翰林學士

特命入直尙書房朕講貫詩文深得其益嗣以卿貳出任封圻
有守有爲賢聲益懋迨擢至正卿

皇考即欲用爲大學士朕親政後召令還朝在南書房直值有
年簡任綸扉深資啟沃凡所陳奏均得大體服官五十餘年依
然寒素家庭敦睦動循矩法洵不愧爲端人正士倚畀方殷本
年入秋以來因患病稍久氣體就衰朕優加眷念賜杖賜輿時
加存問朱珪感戀彌殷時時力疾進內朕鑒其誠悃特行給假
兩月俾得安心調養疊遣御醫診視冀得就痊正擬日內親至
伊邸宅視疾茲遽聞溘逝深爲悼惜于初六日親臨賜奠已派
總管內務府大臣阿明阿齋賜陀羅經被並著先派慶郡王永
璘帶領侍衛十員前往奠醊追維舊學良用軫懷著晉贈太傅
入祀賢良祠賞給內庫銀二千五百兩經理喪事其任內一切

降革處分悉予開復所有應得卹典著該部察例具奏次日
聖駕親臨哭奠既旋宮復

諭曰昨因大學士朱珪溘逝業經降旨加恩因思乾隆年間惟
故大學士劉統勳蒙

皇考高宗純皇帝鑒其品節

賜諡文正易名之典備極優隆顧劉統勳于署總督任內曾經
獲咎褫職復蒙

皇考施恩錄用至朱珪在朝五十餘年外而敷歷督撫內而游
直綸屏身躋崇要從未稍蹈愆尤絕無瑕玷靖恭直歷久不渝
猶愈伊官翰林

皇考簡爲朕師傅爾時朕于經書已皆竟業而史鑑事跡均資
講貫其所陳說無非唐虞三代之言不特非法弗道卽稍涉時
趨之論亦從不出諸口啟沃良多揆諸諡法實足以當正字而
無愧毋庸內閣擬請著卽賜諡文正本曰朕親臨奠醊見其門
庭卑隘清寒之況不異儒素瞻念遺風愴懷未已著于本月初
九日由內務府備辦飯桌派二阿哥前往代朕奠祭俟殯送時

派慶郡王永璘前往主奠目送以示朕眷懷舊學哀榮備至之至意並

御製詩十二韻曰丙歲從函丈相依三十年清風常晉接正誨日敷宣

先帝褒忠直百僚仰俊賢贊襄期永弼啟沃願長延抱疾猶趨侍養痾冀速痊忽驚千古別難遣寸衷悵攀馭

珠邱表騎箕絳闕邊棄予辭禁苑隨

聖麗霄躔德化銘心久良猷篤志堅半生惟獨宿一世不貪錢述實五言挽抒悲三爵連臨喪虛設醴痛結淚傾泉

命南書房翰林黃鉞敬錄於初九日往靈前焚之先是珪病亟時作芻獻二首歿後

上召對諸大臣詢珪臨終有何遺言諸臣以芻獻詩對上卽命以手書草稿呈

覽並

詢年例應貢冊頁向有跋語亦令呈進

賜祭葬十二年三月

諭曰朕展謁

西陵道經畿甸原任大學士朱珪之墓距蹕路數里追維哲輔逝已三月瞻眺松阡中心愴惻著派侍郎英和于本月初五日前往賜奠以達朕懷

御製詩曰碩彥嗟頽壞臨風歎奈何經邦言總正論道益誠多代奠心隨往躬行禮實過雲烟結神想西嶺望嵯峨是月

高宗純皇帝實錄告成

諭曰前大學士朱珪在館八年懋著勤慎著加恩賜祭一壇伊長子朱錫經原任戶部郎中俟服闋後以四品京堂用二十年十月

諭曰明春朕恭謁

西陵回鑾時蹕路經由北惠濟廟拈香因大學士朱珪墳塋在該處附近面諭那彥成查明如距御道五里以內卽親往祭奠若在五里以外卽遣官前往茲據那彥成覆奏在御道四里以內屆期朕由黃新莊至北惠濟廟紆道親臨賜奠用達眷懷舊學之意二十一年三月二十一日

上臨珪墳園賜奠

御製誌感詩曰講幄昔年共五箴誨早垂入閣贊機務輔治惠澤施方期久論道豈料身騎箕永別倏十載路便親酌卮荒村不封樹儉德後代遺淚洒乘騮去回望縈悲思

篤念舊學光及泉壤

恩遇之隆古所未有也子錫經游官太僕寺少卿十五年卒孫涂江蘇候補道

卷六十